

FAASOLOGA MATAUPU VASEGA AMATA 2017

MANATU AOA O LE TAUSAGA: O LE ATUA FA'AOLA (GOD SAVES)

MANATU TA'IALA O FEPUARI: O LE MALAMALAMA I LE AMATAGA

- 12 Na faia e le Atua manu ma laau Kenese 1: 11-12, 25
(Aso Sa o Tupulaga)
- 19 Na faia e le Atua Eva Kenese 2: 21 – 23
- 26 Ua fai le olo o Papelu Kenese 11: 1 – 9

MANATU TA'IALA O MATI: O LE MALAMALAMA I LE AIGA

- 5 Ua papatisoina Iesu Mareko 1: 9 – 11
- 12 Ua valaau Iesu i le au faifaiva Mareko 1: 16 -20
- 19 Ua fanau mai Isaako Kenese 21: 1 – 5
- 26 Ua ave Isaako e fai ma taulaga Kenese 22: 1 – 12

MANATU TA'IALA O APERILA: O LE OLA A'OAO'AINA

- 2 Ua a'oa'oaina le uii Luka 15: 11 – 23
- 9 O le Malaga faatupu a Iesu Mareko 11: 1 – 10
(Aso Sa o Laupama)
- 16 Ua toetu Iesu Mareko 28: 1 -10
(Aso Sa o le Toetu)
- 23 Ua fa'aali le Atua ia Samuelu 1 Samuelu 3: 1 – 18

30 Ua a'oa'o e Iesu Maria ma Mareta Luka 10: 38 – 42

MANATU TA'IALA O ME:

O LE OLA A'OA'OINA I EKALESIA MA NUU

- 7 O le tatalo a le Alii Luka 11: 1 – 4
14 O Ruta ma Naomi Ruta 1: 15 – 18
(Aso Sa o Tinā)
- 28 Ua a'oa'o e Iopu lana fanau Iopu 1: 1 – 5

MANATU TA'IALA O IUNI: O
AMIOGA E TATAU MO FANAU

- 4 Ua valaau Iesu ia Sakaio Luka 19: 1 – 10
11 O le tagata Samaria agalelei Luka 10: 30 – 35
18 Ua talia e Farao le aiga o Iosefa Kenese 47: 1 – 12
25 Ua a'e le faiva o le au so'o Luka 5: 4 – 7

MANATU TA'IALA O IULAI:
E 'AU LE ATUA MA I TATOU

- 2 Iosefa le tama alofa Kenese 43: 15 – 23
9 O Kitiona ma lana au-tau Faamasino 7: 1 – 8
16 Ua vaeluaina le sami ulaula Esoto 14: 15 – 30
23 O le uo a Ionatana ma Tavita 1 Samuēlu 20: 35 – 42
30 O tama loto tetele e to'atolu Tanielu 3: 21 – 27

MANATU TA'IALA O AOKUSO:

O LE ATUA O LE OLA

- | | | |
|----|--|-------------------|
| 6 | Ua maua Mose i le vai | Esoto 2: 1 – 10 |
| 13 | O Noa le tamā faatuatua
(Aso Sa o Tamā) | Kenese 8: 15 – 20 |
| 20 | Ua faamalolo e Iesu le ma'i fula | Luka 14: 1 – 6 |
| 27 | O le tamaitiiti loto foa'i | Ioane 6: 1 – 14 |

MANATU TA'IALA O SETEMA:

E TAUA TAGATA UMA

- | | | |
|----|---------------------------------|---------------------|
| 3 | Ua alofa Tavita ia Mefiposeta | 2 Samuelu 9: 1 – 13 |
| 10 | Ua aai Iesu ma tagata agasala | Mataio 9: 10 – 13 |
| 17 | Ua fa'aaogaina e le Atua Lepela | 2 Tupu 7: 3 – 15 |
| 24 | O le teineitiiti o le taua | 2 Tupu 5: 1 – 14 |

MANATU TA'IALA O OKETOPA:

IA FAAMAONI I LE ATUA

- | | | |
|----|-------------------------------|----------------------|
| 22 | O Tavita le leoleo mamoe | 1 Samuelu 16: 1 – 13 |
| 29 | O Konelio le tagata o nuu ese | Galuega 10: 1 – 8 |

MANATU TA'IALA O NOVEMA:

TUU I LE ATUA O TATOU MANA'O

- | | | |
|----|---------------------------|--------------------|
| 5 | Ua tali le Atua ia Esekia | 2 Tupu 20: 1 – 6 |
| 12 | Ua faamalolo ma'i e Iesu | Mataio 15: 29 – 31 |
| 19 | O le to'oto'o o Arona | Esoto 7: 10 – 12 |
| 26 | Ua ta e Mose le papa | Esoto 17: 1 – 7 |

MANATU TA'IALA O TESEMA:

AVE FEAU O LE KERISIMASI

- | | | |
|----|------------------------------------|-------------------|
| 3 | Ua valaau le agelu ia Maria | Luka 1: 26 – 38 |
| 10 | Ua fa'aali le agelu i leoleo mamoe | Luka 2: 8 – 11 |
| 17 | Ua ave meaalofa a Makoi | Mataio 2: 10 - 11 |

MANATU TAIALA O FEPUARI:

O LE MALAMALAMA I LE AMATAGA

O le manatu taiala o lenei masina, ia a'oa'oina ai le fanau i meana faia i le amataga o le lalolagi.

ASO SA: 12 FEPUARI 2017
(Aso Sa o Tupulaga)

MATAUPU: UA FAIA E LE ATUA MANU
MA LAAU.

SINI: Ia a'oa'o le vasega ia malamalama, na faia e le Atua manu ma laau i le amataga, e aoga mo tatou uma.

TUSI FAITAU:

Kenese 1:11 – 12, 25 (mo le Faiaoga)
Kenese 1: 11, 24 (mo le Vasega)

f11a “Ona fetalai mai lea o le Atua, Ia tupu le vao mu’a mai le eleele, ma le laau afu e tupu ma ona fua.

f24 “ Ua fetalai mai foi le Atua, Ia tutupu ma ola mai le laueleele e taitasi ma lona uiga, o manu vaefa fanua, ma mea fetolofi, ma manu vaefa o le vao, e taitasi ma lona uiga, i le faapea lava”.

FESOASOANI MO FAIAOGA:

I le tatou tusi faitau i lenei aso, o loo ta’u mai ai le vao, ma laau eseese na faia e le Atua. O laau e ‘aina o latou fua, lea tatou te aai ai i le tele o aso, atoa foi ma laau e lē fua mai, e aoga lea e maua ai laupapa e fau ai fale, ma le tele o mea fale e pei o nofoa, laulau ma moega. O laau uma nei na faia e le Atua, e aoga mo tatou uma.

Ae le gata i lea, na ia faia foi manu uma lava i le lalolagi. O manu felelei, manu fetolofi ma manu vaefa. O nisi o manu fetolofi, e aoga mo a tatou meaa, e pei o povi, mamoe, moa ma isi. Na faia foi e le Atua nei manu uma, e aoga tele mo i tatou.

UIGA O UPU MA FUAITAU:

- i) laau afu: o vao tetele e ola mai i o latou fatu, ma ‘aina o latou fua e pei o pinati, kukama, maukeni, meleni, ufi, manioka, tamato, pi ma isi.

- ii) laau aina:o laau e tutupu ma fua mai e pei o moli, apu, mago, ulu, niu, vi, pea ma isi.
- iii) taitasi ma lona uiga:Eseese o latou tutupu, foliga, fua ma igoa. Eseese taimi e fua mai ai, pe ta'i kuata, masina, po o le tausaga.

PESE:

- 1. God made the grass, the ants and the trees x3
God blessed me and my family
 - 2. God made the fish, the shells and the sea x3
God blessed me and my family
 - 3. God made the birds that fly in the sky x3
God blessed me and my family
-
- 1. Na faia e le Atua o vao, loi ma laau
Na faia e le Atua o vao, loi ma laau
Na faia e le Atua o vao, loi ma laau
Ua faamanuia mai i lou aiga
 - 2. Na faia e le Atua ia figota o le sami
Na faia e le Atua ia figota o le sami
Na faia e le Atua ia figota o le sami
Ua faamanuia mai i lou aiga
 - 3. Na faia e le Atua manulele o le lagi
Na faia e le Atua manulele o le lagi
Na faia e le Atua manulele o le lagi
Ua faamanuia mai i lou aiga.

A’OA’OGA:

1. Na faia e le Atua laau ma manu.
2. E aoga laau ma manu ia i tatou.

TATALO:

Faafetai le Atua i le tele o manu ma laau na e faia mo i matou, aemaise le tele o au faamanuiaga na e saunia mo au. Amene.

ASO SA:

19 FEPUARI 2017

MATAUPU:

NA FAIA E LE ATUA EVA

SINI:

Ia a’oa’o le vasega ia malamalama, o le Atua na faia Eva

TUSI FAITAU:

Kenese 2:21 – 23(mo le Faiaoga)
Kenese 2:22(mo le Vasega)

“o le ivi asoaso foi na toina e le Alii le Atua ia Atamu ua na fai ai le fafine, ona ia aumaia lea o ia iā Atamu.”

FESOASOANI MO FAIAOGA:

I le tatou tusi faitau i lenei aso, o loo ta’u ma ai le faiga e le Atua o le fafine. Sa faamoegase Atamu e le Atua, na moe gase ai lava, na le toe lagonaina se mea e tasi auā na moe e faapei o se tagata ua alu le aso o galue.

Ona toina pe aumai lea e le Atua le tasi o ona ivi ‘aso’aso, ma ua ia faasoo ane le aano e sui ai le ivi ua aveese. Ona faia ai lea e le Atua o le fafine, ma Ia aumai ia Atamu, e fai ma ona fesoasoani. Ona fai mai lea o Atamu, o le ivi lava lenei o o’u ivi, ma le aano o o’u aano, e ta’ua foi o ia o le fafine, aua na toina atu ia ai le tane.

Tamaiti, o le fafine lenei na faia e le Atua, o Eva lona igoa. O lona uiga, o le Ola. O ia foi o le ulua’i fafine o le lalolagi na faia e le Atua.

UIGA O UPU:

- i) toina: aumai
- ii) fafine: O le upu Eperu, o Ise
- iii) tane: o le tamaloa.

GALUEGA FAATINO:

Faatino le Tala a le Vasega

PESE:

A Atamu na faia e le Atua
E Eva o le fautua
Sa nonofo i le faatoaga
Lauusiusi ma lanu lauava

A’OA’OGA:

1. Na faia e le Atua le fafine i le ivi ‘aso’aso o Atamu
2. Na faia e le Atua le fafine e fesoasoani ia Atamu

TATALO:

Faafetai le Atua i lou alofa, na e faia ai le fafine e fai ma fesoasoani. Amene.

ASO SA:

26 FEPUARI 2017

MATAUPU:

UA FAI LE OLO O PAPELU

SINI:

Ia a’oa’o le vasega ia malamalama, na fai e tagata le olo o Papelu i le amataga.

TUSI FAITAU:

Kenese 11:1-9 (mo le faiaoga)
Kenese 11:4a (mo le vasega)

*“ona latou fai ane lea, o mai ia,
ina tatou fai ia o se aai, ma se olo,
ia oo lona tumutumu i le lagi.”*

FESOASOANI MO FAIAOGA:

Ina ua mavae atu le lolo, ua nonofo solo foi le fanau a Noa i atunuu o le lalolagi. Ua latou omai mai Sasa’e, ona latou maua lea o le fanua laugatasi i le nuu o Senara, ua latou nonofo ai. Ua latou fetautalatalaa’i, ua fai atu le tasi i le isi, o mai ia, ina tatou faia se olo e tau lona tumutumu i le lagi. Ua fa’aaoga lo latou popoto ma atamamai i le fausiga o le olo e ala i le faiga o maaomea, o panisina, atoa ai ma pulu emer. O mea ia sa latou gaosia i o latou lima, ma fai ai le olo.

Peitai, na faaeseeseina e le Atua le gagana a tagata, ina ia le taunuu le mea na latou mananao i ai. Na finagalo le Atua ina ia faataape solo tagata i le lalolagi, e fa'aaoga lo latou popoto ma tamaoaiga faale-natura na ia saunia e ala i lana foafoaga, e manuia ai atunuu eseese i le lalolagi.

UIGA O UPU:

- i) maaomea: sa fa'aaogaina e tagata Palesitina e pei o ni piliki e fau ai fale. E palu faatasi le
elele i le vai, ma 'au o saito, ona teu lelei
lea faatafafa ma ave e faala pe tunu i le afi
e faamalo ai.
- ii) panisina: O le suavai totoo paepae, e mago ona
malo lea, sa faaaogaina e vali ai fale. (e
pei o le namu lea poo le kapai lea sa
fa'aaogaina e vali ai falesa).
- iii) pulu emeri: e pei o le ta fai auala. O le pulu tonu lena
sa fa'aaogaina faapanisina e tagata, e
vali ai fale. Tasi lena faailoga o le maoa'e
o le iloa o le tagata na fauina le olo i
Papelu, ina ua latou mafai ona gaosi nei
mea uma.

GALUEGA FAATINO:

Valivaliga Ata: Ia fai ni kopi o le ata ua saunia ma tufa i
le vasega e galulue ai.

PESE: O lou Atua e tele/My God is so big

A’OA’OGA:

1. Na fai e tagata le olo o Papelu i le amataga.
2. E fesoasoani mai pea le Atua i o tatou faaletonu.

TATALO:

Faafetai i le Atua i lou alofa ua e foa’i mai ai le potou ia i matou.
Amene.

MANATU TAIALA O MATI: O LE MALAMALAMA I LE AIGA

O le mataupu o lenei masina, e faasino i nisi o mea na tutupu i totonu o aiga ina ia a’oa’o ma malamalama ai le fanau.

ASO SA: 05 MATI 2017

MATAUPU: UA PAPTISOINA IESU.

SINI: Ia a’oa’o le vasega ia malamalama, na papatisoina Iesu i le vai o Ioritana.

TUSI FAITAU: Mareko 1:9 – 11 (mo le Faiaoga)
Mareko 1:9e (mo le Vasega)

“ua papatisoina foi o ia e Ioane i Ioritana.”

FESOASOANI MO FAIAOGA:

I totonu o Palesitina, e i ai le vaitafe tele lava e ta'ua o le Ioritana. O lenei vaitafe, sa papatisoina ai e Ioane le toatele o tagata Iutaia. I le amataga o le galuega faaola a Iesu, na sau ai o Ia mai Kalilaia, ma oo mai ai Ioane le papatiso i le vaitafe o Ioritana. O le mana'o o Iesu, ia papatisoina o Ia e Ioane i le vaitafe o Ioritana. Ina ua uma ona papatisoina Iesu e Ioane, ona iloa lea e ia o le lagi ua masae, po ua fa'aavanoa, ma ua afio ifo le Agaga Paia i ona luga, e peiseai se lupe. Sa oo mai foi le leo mai le lagi, ua faapea mai, "O lo'u Atalii pele oe, ou te fiafia ia te oe."

Tamaiti, o le papatisoga, o le sauniga Paia lea a le Ekalesia Kerisiano, e faailoa ai, ua avea i tatou e fai ma atalii ma afafine o le Atua i totonu o le Ekalesia, o le aiga o le Atua.

GALUEGA FAATINO:

Valivaliga Ata. Fai ni kopi o le ata ua saunia e tufa i le vasega e galulue ai.

PESE: We are one big happy family
 God's family, God's family
 We are one big happy big happy family
 God's family are we

He is my brother
She is my sister
Our Father in Heaven
Who loves you and me

O i tatou o le au aiga
Au aiga o le Atua

O i tatou o le au aiga
Aiga o le Atua

O oe o lo'u tuagane
O oe o lo'u tuafafine
Le Tamā, i luga
E alofa ia i taua.

A'OA'OGA:

1. Na papatisoina Iesu i le vai o Ioritana.
2. O Iesu, o le atalii pele o le Atua.
3. Ia avea i tatou o atalii ma afafine o le Atua.

TATALO:

Faafetai Tamā mo le sauniga Paia o le papatisoga, ina ua fai ai i matou o lau fanau moni, i totonu o lau Ekalesia aoao. Amene.

ASO SA:

12 MATI 2017

**MATAUPU:
FAIFAIVA.**

UA VALAAU IESU I LE AU

SINI:

Ia a'oa'o le vasega ia malamalama, na valaau Iesu i le au faifaiva e avea ma ona soo.

TUSI FAITAU:

Mareko 1:16-20(mo le Faiaoga)
Mareko 1:17(mo le Vasega)

“Ona fetalai atu lea o Iesu ia te i laua, Ina mulimuli mai ia iā te au, oute faia oulua ma faifaiva i tagata.”

FESOASOANI MO FAIAOGA:

O le vai o Kalilaia, e tele ina fa'aaoga e tagata faifaiva e fagogota ai. E savali ane Iesu e latalata i le vai, ona ia vaaia lea o Simona Peteru ma lona uso o Aneterea, o loo fai lo la faiva. Ona valaau atu lea o Iesu ia te i laua ua faapea atu, "Ina mulimuli mai ia iā te au, ou te faia oulua ma faifaiva i tagata."

Ona la tuua lea o o la upega, ae mulimuli atu ia te i laua. Ua latou savavali teisi atu, ona iloa atu lea e Iesu o Iakopo ma Ioane, o le fanau a Sepetaio, o loo tau fai masae o latou upega. Ona toe valaau foi lea o Iesu ia i laua ina ia mulimuli mai ia te Ia. Ona la tuua lea o le la tamā o Sepetaio i le vaa, ae mulimuli atu ia te Ia.

Tamaiti, e ese le usita'i o le au faifaiva ia Iesu. E tasi lava le valaau, tuu uma latou faiva sa fai ae mulimuli atu ia te ia. O le uiga o le valaau a Iesu i le au faifaiva, ia tuu le fagotaina o i'a, ae o e fagota mai tagata mo Iesu ma lona finagalo, e ala i le a'oa'o ma tala'i atu le Talalelei ia Iesu Keriso.

GALUEGA FAATINO:

Valivaliga Ata. Fai ni kopi o le ata ua saunia e tufa i le vasega e galulue ai.

PESE: Ou te faia outou ma faifaiva i tagata
I will make you fishers of men

A'OA'OGA:

1. Na filifili e Iesu le au faifaiva e fai ma ona so'o.
2. Ia tatou ususita'i e pei o le au faifaiva.

TATALO:

Faafetai le Atua i lou a'oa'o mai ina ia matou usita'i, e manuia ai i matou.. Amene.

ASO SA: 19 MATI 2017

MATAUPU: UA FANAU MAI ISAAKO.

SINI: Ia a'oa'o le vasega ia malamalama, o le fanau mai o Isaako, o le faataunuuna lea o le folafolaga a le Atua ia Aperaaamo.

TUSI FAITAU: Kenese 21:1-5 (mo le Faiaoga)
Kenese 21:3 (mo le Vasega)

“Ua faaigoa foi e Aperaaamo lona atalii na fanau mai ia te ia, o le na fanau mai e Sara ia te ia, o Isaako.”

FESOASOANI MO FAIAOGA:

O Aperaaamo, o se tamā e usitai tele i le Atua. I le tasi aso, na o mai ai tagata e toatolu, e o e faaataunuu le finagalo o le Atua i le tasi nuu. Na latou afe i le fale o Aperaaamo e fai ai sina malologa, ona toe fa'auau lea o le latou malaga.

Na faate'ia Aperaaamo i le tutu atu o tagata neii lona fale ie. E lei toe faatali Aperaaamo, a ua faavave atu i lana auaua ma lona toalua o Sara, e faavave mai le kukaina o se meaai ma se vai, mo i latou nei.

Ua latou aai, ona fai atu lea o le tasi o le au malaga ia Aperaaamo. “Ou te toe foi mai lava ia te oe i lela tausaga. Faauta foi, e fanau mai e lau avā o Sara se tama tane.” Ua ataata Sara le toalua o Aperaaamo i lea tala, auā na faapea a ia, e le toe maua e i laua se tama ona ua matutua i laua. Tamaiti, na taunuu lava le folafolaga lenei na fai ia Aperaaamo. O le selau o tausaga o Aperaaamo, na fanau ai lona atalii, ma faaigoa ia te ia o Isaako. O le uiga o le igoa o Isaako, o ‘ata’ata.

GALUEGA FAATINO:

Valivaliga Ata: Fai ni kopi o le ata ua saunia e tufa i le vasega e galulue ai.

PESE: Le alofa o le Atua e ofoofogia.

A’OA’OGA:

1. E alofa le Atua i tagata usitai.
2. Ia e alofa i soo se isi e afe atu i lou fale.

TATALO:

Faafetai Tamā ua e a’oa’o mai ia i matou ina ia matou ola usiusita’i. Amene.

ASO SA: **26 MATI 2017**

MATAUPU: **UA AVE ISAAKO E FAI MA**
TAULAGA.

SINI: Ia a’oa’o le vasega ia malamalama, na ave Isaako e fai ai le taulaga i le Alii.

TUSI FAITAU:

Kenese 22:1-12(mo le
Faiaoga)
Kenese 22:9 (mo le Vasega)

“Ua oo atu i laua i le mea na tauina mai ai e le Atua ia te ia; ona faia lea e Aperaaamo o le fata faitaulaga i lea mea, ma fa’aafu le fafie, ua na fusifusi foi lona atalii o Isaako, ma faaee ia te ia i le fata i luga o le fafie.”

FESOASOANI MO FAIAOGA:

I le tasi aso, na fetalai ai le Atua ia Aperaaamo, ina ia ave lona atalii e toatasi e pele ia te ia, o Isaako lea, e fai ai le taulaga mu i le mauga o Moria.

I le taeao na soso’o ai, na alu ai le malaga a Aperaaamo ma lona atalii, faatasi ai ma taulelea e toalua, ma fafie e fai ai le taulaga mu, ma agai atu i le mea na tauina mai ai e le Atua ia te ia. Ua oo i le aso tolu, ona tuua lea e Aperaaamo o taulelea e faatali atu, ae ua o na o laua ma Isaako. Ua ave foi fafie, o le polo ma le afi. A o alu le la faigamalaga, ona fesili lea o Isaako i lona tamā, po o fea se tama’i mamoe e fai ai le taulaga mu. Na tali Aperaaamo, e foa’i mai e le Atua se tamai mamoe e fai ai le taulaga mu.

Ina ua oo atu i laua i le mauga, ona faia lea e Aperaaamo o le fata faitaulaga. Ua faaola foi fafie i le afi, ona fusifusi lea o lona atalii ma tuu i luga o fafie i le fata. Ona tago lea o Aperaaamo i le polo o le a fasioti lona atalii, ona valaau ifo lea o le agelu a le Alii ia te ia mai le lagi, ua faapea mai, “Aperaaamo, Aperaaamo.” Ona tali atu lea o ia, “O au lenei.” Ona fetalai mai lea o Ia, “Aua le oo lou lima i le tama, auā ua ou iloa nei ua e

usita'i i le Atua, ina ua e lē taofia lou atalii, o lou atalii e toatasi, a ua e tuu mai ia te au.”

Ua vaai ane Aperaamo, ma iloa atu le mamoe po'a, o loo lavelavea ona nifo i le laau filifili. Ua aumai e Aperaamo le mamoe po'a, ma osi ai le taulaga mue sui ai lona atalii.

UIGA O UPU:

i) polo: o le naifi

GALUEGA FAATINO:

Valivaliga Ata. Fai ni kopi o le ata ua saunia e tufa i le vasega e galulue ai.

PESE: Faalogo ma usita'i.

A'OA'OGA:

1. Na ave Isaako e fai ai le taulaga i le Atua.
2. E usitai Aperaamo i le Atua.
3. Ia tatou pei o Aperaamo e usitai.

TATALO:

Le Atua e, fesoasoani mai ia i matou ina ia matou ola usiusita'i i aso uma. Amene.

**MANATU TAIALA O APERILA: O LE OLA
A’OA’OINA**

Ua filifilia le manatu autu e pei ona taua i luga, e fai ma manatu taiala o lenei masina. O le naunauta’iga, ia amata ona faailoa i tamaiti nisi o a’oa’oga taua a lo tatou Alii, e pei o le amio ia lelei, loto alofa, loto maualalo, atoa ai ma le loto salamō ina ia fai lea ma taiala i o latou olaga tuputupua’e.

ASO SA: 2 APERILA 2017

MATAUPU: UA A’OA’OINA LE UII.

SINI: Ia a’oa’o le vasega ina ia malamalama, na toe foi le tama i lona aiga ina ua salamō.

TUSI FAITAU: Luka 15:11 – 23 (mo le Faiaoga)
Luka 15:18 (mo le Vasega)

“O le a ou tulai ma alu i lou tama, oute fai atu ia te ia, “Lou tamā e, ua ou agasala i Le o i le lagi, atoa ma ou luma.”

FESOASOANI MO FAIAOGA:

Sa i ai se aiga, o se tamā ma lana fanau tama e toalua. O se aiga fiafia ma manuia auā sa tele a latou tupe. I le tasi aso, na fai ai le tama laitiiti poo le uii i lona tamā, e manao e aumai lana vaegatupe e pule ai, ma fai ai mea e manao ai. E ui ina faanoanoa le tamā i le manaoga a lona atalii, ae sa ia faia pea le mea ua manao i ai.

Ua alu le tama ma lana vaegatupe, ma tafafao ai ma ana uo. Ua soona fa'aalu ana tupe i mea e manana'o ai, ma ua galo ai lava ia te ia lona tamā ma lona aiga. Peitai, ina ua uma ana tupe, ua sosola foi ana uo sa latou mafuta, ua leai se mea e totoe ia te ia. Ua lagona le fiaai, ma ua aisi solo, ua leai foi se mea e nofo ai. Ona manatua lea o le tama lona tama, ona lagona lea e ia o le loto salamō, ma ua toe fia foi i lona tamā ma lona aiga.

Tamaiti, na matua fiafia le tamā o le uii ina ua toe foi atu lona atalii i lo latou aiga. Ioe, sa tumau pea le alofa o le tamā i lona atalii, e ui ina alu ma faamaumau tupe a le aiga, ae ua sili lona fiafia ina ua toe foi atu ia te ia ma le aiga.

GALUEGA FAATINO:

Valivaliga Ata: Fai ni kopi o le ata ua saunia e tufa i le vasega e galulue ai.

PESE: A iai Iesu i se aiga, o se aiga fiafia
 With Jesus in a family, happy happy
 home.

A'OA'OGA:

1. Na toe foi le uii i lona aiga ina ua lagona lona sese.
2. Faalogo ma usitai i matua e manuia ai.

TATALO:

Faafetai Iesu i lou a'oa'o mai ia i matou ina ia matou faalogo ma usita'i i o matou matua, e manuia ai o matou olaga. Amene.

ASO SA:

**09 APERILA 2017
(Aso Sa o Laupama))**

**MATAUPU:
IESU.**

O LE MALAGA FAATUPU A

SINI:

Ia a’oa’o le vasega, o le Aso Sa o le Laupama, e faamanatu ai le malaga faatupu a Iesu i Ierusalem.

TUSI FAITAU:

Mareko 11:1 – 10(mo le Faiaoga)
Mareko 11:9 (mo le Vasega)

“Ua alalaga foi e na muamua ma e na mulimuli ua faapea, “Osana! Ia manuia le afio mai i le suafa o le Alii.”

FESOASOANI MO FAIAOGA:

Ina ua latalata le malaga a Iesu ma ona so’o i Ierusalem, ona auina atu lea e Iesu o so’o e toalua, e o e tatala mai le asini o loo nonoa i le nuu o loo tuaoi ma i latou. O le asini foi, e le i tietie ai lava se tasi. E lua te tatala ma aumai, a fesili ane se tasi poo fea a tatala i ai le asini, ona lua fai atu lea i ai, e manao i ai le Alii.

Ua aumai le tamai asini ia Iesu, ua lafo foi o latou ofu i luga, ona tietie ai lea o ia. Ua fati ane foilala o laau, ua lialia’i, ua alalaga ma pepese. “Osana! Ia manuia le afio maii le suafa o le Alii. Osana i mea aupito i luga.” O le alalaga fiafia o tagata ma pepese, o le faailoga lea o lo latou taliaina o le tupu ua afio mai.

Tamaiti, o Iesu, o le Tupu o le lagi ma le lalolagi. Peitai, e ui lava o ia o le Tupu, a ua le fefe e malaga i Ierusalema e fetaia'i ma puapuaga. Aisea?, O lona alofa ia i tatou uma. O lona alofa lea ua faaeaina ai o ia e le Atua i le manumalo.

UIGA O UPU:

- i) tupu: O le tagata nate pulea se atunuu po o se malo. O le fa'aaoo, poo le faatumutumuga o tagata uma o se malo, ma faaaloalo uma iai tagata.

- ii) asini: o le manu sa tietie ai Iesu i lana malaga faatupu. E le tatau i se tupu ona fa'aaogaina lenei ituaiga manu mo se malaga, ae na filifilia e Iesu e ta'u atu ai i tagata, o le tupu ua afio mai, o le tupu o le filemu ma agamalu.

- iii) aso o le laupama: O le uiga o le laupama, o le aso o le manumalo o Iesu i ona puapuaga ma faigata. Ua faaigoaina e fai ma faailoga o le manumalo.

GALUEGA FAATINO:

1. Faatino le tala:

2. Ia a'oa'o le pese ua saunia i le vasega.

PESE: Se'i tatou pepese
 Ma le fiafia
 Ia Iesu le tupu
 O le ua viia.

Tali: Osana, outou tamaiti
Osana vivii ia Iesu
Ina mulimuli alalga pea
Osana! Osana.

A’OA’OGA:

1. O Iesu le tupu o le lagi ma le lalolagi.
2. Na tietie Iesu i le asini.

TATALO:

Le Atua lo matou tama, fesoasoani mai ia i matou ina ia ‘aua ne’i matou fefefe e fetaia’i ma ni puapuaga o lenei olaga, aua o lo o faatasi mai lau Afio ia te i matou. Amene.

ASO SA:

**16 APERILA 2017
(ASO SA TOETU)**

MATAUPU:

UA TOETU IESU.

SINI:

Ia a’oa’o le vasega ia malamalama, na toetu manumalo Iesu mai i le oti ma le tuugamau.

TUSI FAITAU:

Mareko 28:1 – 10(mo le Faiaoga)
Mareko 28:6 (mo le Vasega)

“E le o iinei o ia, aua ua toe tu mai o ia, pei ona fetalai atu ai o ia. O ma, ina matamata i le meana tuu ai o ia.”

FESOASOANI MO FAIAOGA:

O le tala i le toetu manumalo o Iesu, o se tala ofoofogia ma le matagofie, i se mea e uiga ese ma le matautia na tupu i le lalolagi, e lei tupu muamua. O fafine e toalua o Maria le Makatala ma le isi Maria, na o e asiasi i le tuugamau. Na faafuasei ona to le mafuie tele. O le agelu foi a le Alii na alu ifo mai le lagi, ma fuli ese le maa na i le gutu o le tuugamau na tietie i ona luga.

Na vaaia e nei fafine le tagata e pei o le uila lona tino mai, ma ona ofu ua sinasina e pei o le kiona. Ua tetemu ma matata'u ia te ia e na leoleo, ua liua i latou e pei o ni tagata oti. Ua fai atu le agelu i fafine, “’Aua lua te matatau. O Iesu lea na faasatauroina, ua lē o iinei o ia, ua toetu mai. O mai, ina matamata i le mea na tuu ai le Alii. Ina o atu ia ia vave, lua te tau atu i ona so’o, ua toetu mai o ia nai e ua oti.”

Tamaiti, ua faaolaina i tatou e Iesu e ala i lona maliu ma lona toetu manumalo. O le talalelei ma le tala fiafia foi lea mo oe ma lou aiga, o lou nuu ma le Ekalesia. O le tatou faamoemoe ola foi lea auā a uma lenei ola, tatou te tutu mai faatasi ma Iesu toetu manumalo.

GALUEGA FAATINO:

1 FESILI MA TALI

a) O ai na o e asi le tuugamau o Iesu?

Tali: O tinā e toalua o Maria le Makatala ma le isi Maria.

(e) Aisea na tete'i ai tinā?

Tali: Ina ua o atu ua leai se maa i le gutu o le tuugamau.

(i) O le a le fa'aaliga na la vaaia?

Tali: O le agelu ua fa'aalia ane, ua toetu Iesu.

2. TALA FAATINO: Ia faatino le tala e le vasega.

PESE: God's not dead/ E le o maliu le Atua

God's not dead, He is alive x3

I feel Him all over me

I can feel Him in my feet

I can feel Him in the church

I can feel Him in the street

I can feel Him in the air

I can feel Him everywhere

I feel Him all over me

E le o maliu le Atua, O loo soifua x3

Ou te lagonaina pea

Ou te lagona i ou lima

Ou te lagona i ou vae

Ou te lagona i le lotu

Ou te lagona i le malae

Ou te lagona i le ea

Ou te lagona i soo se mea

Ou te lagonaina pea

A’OA’OGA:

1. Ua toetu manumalo Iesu nai le oti ma le tuugamau.
2. ‘Aua le fefefe i le oti.

TATALO:

Faafetai Iesu i lou faaolaina o i matou e ala i lou maliu ma lou toetu manumalo. Amene.

ASO SA:

23 APERILA 2017

MATAUPU: SAMUELU.

UA FA’AALI LE ATUA IA

SINI:

Ia a’oa’o le vasega ia malamalama na faaali le Atua ia Samuelu.

TUSI FAITAU: Faiaoga)

1 Samuelu 3: 1 - 18 (mo le

Vasega)

1 Samuelu 3: 4 (mo le

“Ona valaau lea o le Alii ia Samuelu, ua tali atu o ia, O au lenei.”

FESOASOANI MO FAIAOGA:

O Samuelu, o ona matua o Elekana ma Hana. Na tatalo Hana i le Atua ina ia foai mai se tama mo ia. Na tali mai le Atua e tusa o le tatalo a Hana. Ua foai mai le tama ma faaigoa ia te ia o Samuelu. O le uiga o le igoa o Samuelu, “Ua faafogaina e le Atua.”

Ina ua matua Samuelu, ona manatua lea e Hana lana folafolaga sa fai i le Atua e faapea, a foai mai se tama mo ia, onaia toe faafoi lea e auauna i le Atua. Ona ia ave lea o Samuelu ia Eli le ositaulaga, e nofo i le malumalu ma fesoasoani ia te ia.

I le tasi po a o moe Samuelu, na ia faalogoina ai, o loo valaau le tagata ia te ia. Na ia tu i luga ma momo'e atu ia Eli. E faatolu ona valaau le tagata ia Samuelu, o le faatolu foi lena ona momo'e o ia ia Eli. O iina na iloa ai e Eli, ua valaau le Atua ia Samuleu. Ona fai loa lea o Eli ia Samuelu, a toe valaau atu se isi, ona e tali lea i ai, "Fetalai mai ia le Alii e, auā o loo faalogologo atu lau auauna." Ua iloa e Eli, ua valaau le Atua i le tama o Samuelu.

GALUEGA FAATINO:

Valivaliga Ata: Ia fai ni kopi o le ata ua saunia ma tufa i le vasega e galulue ai.

PESE: Faalogo ma usitai

A'OA'OGA:

1. Na valaau le Atua ia Samuelu.
2. Na fesoasoani Samuelu ia Eli le ositaulaga.

TATALO:

Faafetai Tamā i lou a'oa'o mai ina ia pei i matou o Samuelu, e fesoasoani i le faiga o feau. Amene.

ASO SA:

30 APERILA 2017

**MATAUPU:
MA MARETA.**

UA A’OA’O E IESU MARIA

SINI:

Ia a’oa’o le vasega ia malamalama, e finagalo Iesu e faamuamua le Atua i totonu o aiga.

TUSI FAITAU:

Luka 10:38-42 (mo le faiaoga)

Luka 10:41e (mo le

vasega)

*“Mareta e, Mareta e, ua e popole
ma ua pupu lou loto i mea e tele.”*

FESOASOANI MO FAIAOGA:

O le tasi aai o Petania le igoa, ua ta’ua foi o le aai o Maria ma lona uso o Mareta (Ioane 11:1). Ai lava ona o le nuu tonu lea na iai lea aiga, ma sa iloga foi meana tutupu ai, lea ua mafua ai ona ta’u o le aai o Maria ma Mareta.

I le tasi aso, na afe ane ai Iesu e fai sina mapu ma malolo i le fale o Maria ma Mareta. Sa matauina e Iesu le pisi tele o Mareta i le tapenaina o le fale ma sauniuni mea uma, aua le taliina o le la malo ua afe atu, o Iesu lea. A o Maria, ua nofo o ia i lalo i tafatafa o Iesu ma faalogologo i ana a’oa’oga. Na tupu le le fiafia o Mareta i lona uso o Maria, ona o le le fesoasoani atu ia te ia. Na iu lava ina fai atu Mareta ia Iesu, e fai ane ia Maria e alu atu sei fesoasoani ia te ia.

Peitai, ua tali Iesu ia Mareta, “Mareta e, Mareta e, ua e popole ma pupu lou loto i mea e tele, ae ua filifili foi Maria i lea mea lelei ma taua, o le fia faalogologo lea i upu lelei ma a’oa’oga taua tau i le malo o le Atua. E foliga mai na fetalai atu Iesu ia Mareta, ia faamuamua mea e tatau ona faamuamua.

GALUEGA FAATINO:

Valivaliga Ata: Ia fai ni kopi o le ata ua saunia ma tufa i le vasega e galulue ai.

PESE: I have decided to follow Jesus/Ua ou filifili e mulimuli ia Iesu.

A’OA’OGA:

1. Ia tatou fiafia e faalogo i a’oa’oga ma tala ia Iesu.
2. Ia faamuamua Iesu i o tatou olaga.

TATALO:

Faafetai Iesu i lou a’oa’o mai ina ia faamuamua ia i matou lau Afio. Amene.

MANATU TAIALA O ME: O LE OLA A’OA’OINA I EKALESIA MA AIGA

O le ola a’oa’oina lelei o fanau, o le vaega pito i sili lea ona taua. E le gata ia aoaoina lelei i le poto salalau, ae ia faapea foi i le itu faa-le agaga. Ua tele faafitauli e tutupu mai i nei vaitau i fanau ona ua le maua avanoa e a’oa’oina ai i aualea e manuia ai ma iloa ai mea e lē talafeagai. O Ekalesia ma aiga, o sosaiete tetele ia e lua e amata mai ai le ola a’oa’oina o le fanau. A lelei

ona faavae mai le olaga o le tamaiti i totonu o sosaiete ia, e solo lelei foi taumafaiga uma.

ASO SA:

7 ME 2017

MATAUPU:

O LE TATALO A LE ALII

SINI:

Ia a’oa’oina le vasega ina ia latou iloa le tatalo a le Alii. O le tatalo foi lea na a’oa’o mai lava e Iesu ina ia tatou feso’otai atu ai ia te ia i aso uma o lo tatou ola.

TUSI FAITAU:

Luka 11 : 1 – 4 (mo le Faiaoga)
Luka 11 : 1 (mo le Vasega)

“Le Alii e, ia e a’oa’o mai ia te i matou i tatalo; e faapei o Ioane ona a’oa’o i ona so’o”.

FESOASOANI MO FAIAOGA:

Sa i ai Iesu i le tasi nofoaga, sa tatalo ai o Ia ao faalogologo lona au so’o. Ua faalogologo atu le au so’o, oka se manaia o le tatalo a Iesu, ma ua manana’o foi ia latou iloa ona tatalo e pei o Ia. Na uma le tatalo a Iesu, ae fai atu loa le tasi o ona so’o ia te ia, “Le Alii e, a’oa’o mai ia te i matou i le tatalo; matou te fia iloa foi ona tatalo.” E lei toe faatali Iesu ae ua a’oa’o atu loa i lona au-so’o upu ia o le tatalo. (Lo matou Tamā ... **fai faatasi e tamaiti**). Tamaiti, o upu tonu lava ia o le tatalo a Iesu na a’oa’o i ona so’o.

O lea lava ua ia a’oa’o mai le tatalo ina ia tatou tatalo ai i aso uma lava o lo tatou ola, e pei ona ia a’oa’o i ona so’o. Ia faapena

foi tatou tamaiti, ia tatou fiafia e a’o le tatalo a le Alii e pei o le au so’o o Iesu. O le tatalo, o le auala lea tatou te talanoa atu aii le tatou uo o Iesu. E le faapea seiloga e te alu i le lotu i Aso Sa, ona fa’atoa e tatalo lea. Ia tatalo lava i aso uma i soo se mea e te i ai. E tusa lava pe le moeiini ou mata, ae a e mafaufau lava i le Alii ma ta;u i ai mea uma e te manao ai, o lau tatalo lava lea i le Alii.

A faapea foi e i ai sau uo i le aoga e le o iloa le tatalo a le Alii, o lau galuega lelei lea e fai mo lau uo, o le a’oa’o i ai o le tatalo a le Alii, e pei ona a’oa’o mai e Iesu. E fiafia lava la tatou uo o Iesu pe a tatou tatalo ma talanoa atu ia te ia e ala i le tatalo.

GALUEGA FAATINO:

Fai ni kopi o le ata ua saunia e tufa i le vasega e galulue ai.

PESE:

Fai sau tatalo

Fai sau tatalo i le taeao

Fai sau tatalo i le ao

Fai sau tatalo i le po

E faafiafia ai lou loto

Whisper a prayer in the morning

Whisper a prayer at noon

Whisper a prayer in the evening

To keep your heart in tune

A’OA’OGA:

1. Ua a’oa’o mai Iesu ia tatou iloa ona tatalo
2. Ia fiafia e tatalo i aso uma o lo tatou ola.
3. ‘Aua le ma e tatalo i soo se mea e te i ai.

4. TATALO FAAIU:

Le Atua lo matou Tamā, faafetai i lou a’oa’o mai ia i matou ina ia matou iloa ona tatalo atu i lau Afio.

Amene

ASO SA: 14 ME 2017

**MATAUPU: O RUTA
(Aso Sa o Tina))**

SINI: Ia a’oa’o le vasega ia malamalama, e alofa faamaoni Ruta ia Naomi. E a’oa’oina ai i latou ina ia iloa ona ola alolofa i o latou tinā.

TUSI FAITAU: Ruta 1 : 6 - 18 (mo le Faiaoga)
Ruta 1 : 17 (mo le Vasega)

“e fai lou Atua mo’u Atua; o le mea e te oti ai, ou te oti ai, e tanu ai foi au; Ia faapea ona faia e le Alii ia te au, ma ia faaopoopo i ai, pe afai e tuueseeseina i taua ma oe i se tasi mea se’i vagana le oti. ”

FESOASOANI MO FAIAOGA:

O Ruta ma Naomi, o nisi nei o tinā o lo’o ta’u mai i le Tusi Paia. E iai le nuu e igoa ia Moapi i totonu o Palesitina. O le nuu tonu lava lea sa nonofo ai Naomi ma Ruta. O Naomi, e toalua lana fanau tama na faitoalua i fafine Moapi, o Orepa ma Ruta. Na umi lava ni tausaga na nonofo ai le aiga lea o Naomi i Moapi,

ma iu ai ina feoti ai lona to'alua, atoa ai ma lana fanau tama, ae totoe ai na o Naomi, Orepa ma Ruta.

Ua alofa tele le loomatua o Naomi i taitoalua o lana fanau. O lea, na ia fai atu loa ia te i la'ua, Orepa ma Ruta, omai ia oulua e toe fo'i i lua aiga, aua e leai se aoga tatou te toe nonofo ai pea, aua ua leai ni lua taitoalua. O lea na toe fo'i ai Orepa, ao Ruta, ua nofo pea o ia. Na fai atu Ruta ia Naomi, se Naomi, aua e te finau mai ia te au, ta te nonofo pea ma oe. O le mea e te alu i ai, ou te alu ai fo'i. E fai lou Atua ma o'u Atua; o le mea e te oti ai, ou te oti ai, e tanu ai fo'i a'u.

O Ruta o se teine alofa tele ia Naomi, lea lava ua le toe foi i lona aiga ae nofo e tausi Naomi. O se a'oa'oga taua foi lea mo i tatou le fanau, ia tausi ma le faamaoni i o tatou tinā. Ia 'aua lava na o le Aso Sa lenei o tinā, ao aso uma o lenei olaga.

PESE: (fati : O le alofa o le Atua e pei o se li'o tele)

O le alofa o le tinā, e fai pea i aso uma
E ui i lo'u faalogogata, e alofa mai pea
O le alofa o le tinā, e fou pea i aso uma
Faalogo lelei ia tinā, e manuia ai lou ola

Tama ma teine o le tala lena, mo le Aso
Sa o tina

E ui i lou faalogogata, e alofa mai pea tina
O le alofa o le tina, e fou pea i aso uma
Faalogo lelei ia tina, e manuia ai lou ola

GALUEGA FA'ATINO:

1. Valivaliga Ata: Ia faini kopi o ata ua saunia e valivali e le vasega.
2. Fa'atino le tala e tamaiti/E mafai ona fa'atino le tala e faiaoga, soo se auala lava e faigofie ona malamalama ai tamaiti i le tala.

A'OA'OGA:

1. E alofa Ruta ia Naomi
2. Ia tatou alolofa i o tatou tinā.

TATALO:

Faafetai Tama i lou a'oa'o mai ia i matou ina ia matou alolofa i tagata matutua. Amene.

ASO SA:

28 ME 2017

MATAUPU: FANAU

UA A'OA'O E IOPU LANA

SINI:

Ia a'oa'o le vasega ia malamalama, na a'oa'oina lelei e Iopu lana fanau i auala e tatau ai i totonu o lona aiga.

TUSI FAITAU:

Iopu 1 : 1 – 5 (mo le Faiaoga)
Iopu 1 : 5 (mo le Vasega)

“ona alu lea o le feau a Iopu, ma na faapaiaina i latou; sa tulai o ia i le taeao lava, ma na faia taulaga mu...,”

FESOASOANI MO FAIAOGA

Sa i ai se toeaina e igoa ia Iopu i le nuu o Usa. O ia o se tamā amiolelei, e talitonu ma faamaoni i le Atua. O ia fo’i o se tamā e mata’u i le Atua. E to’asefulu lana fanau. Eto’afitu tama,ma teine e to’atolu. O le aiga lenei,e tele le tamaoigai povi, kamela, mamoe, o fale, atoa ai ma fanua. Ae le gata i lea,o le tele o a latou auauna e fesoasoani ia i latou i le tele o a latou galuega.

E uiina mauoloa le aiga o Iopu, peitai, e le’i tuua ai lava le a’oa’o atu o Iopu i lana fanau i mea e tatau ona fai. Ua uma lelei ona faatonu e Iopu lana fanau i feau eseese i totonu o lo latou aiga. Ua a’oa’o atu Iopu i lana fanau, ina ia ‘aua lava nei galo ia i latou le Atua ma lona alofa. Na fa’apaia e Iopu lana fanau, ma a’oa’o i le faiga o taulaga faafetai i le Atuailona agalelei i lo latou aiga.

O a’oa’oga ia a Iopu tamaiti na faia i lona aiga ma lana fanau. O a’oa’oga e aoga tele mo le fanau,ina ia iloa ai e i latou ona ola fiafia e mafuta pea ma matua ma aiga, ae sili ai ona iloa faafetai i le Atua i aso uma.

UIGA O UPU:

- i) Usa - o le nuu lea na nonofo ai Iopu ma lana fanau
- ii) mata’u - o lou usitai lea ona o lou alofa i le Atua. O le mata’u foi e na o le Atua lava e faasino i ai.

- iii) mauoloa - o le tagata e tele ana tupe, manaia fale, tele lafu manu, tele faatoaga, tele taavale e fai foi auauna e faia uma feau.
- iv) Fa'apaia e Iopu lana fanau: fai e Iopu le tatalo ma tuu ona lima i luga o ulu o tamaiti, ina ia faamanuia mai i ai le Atua ma faafetaia ai Lona alofa mo mea uma ua faia mo ia ma lana fanau.

GALUEGA FAATINO:

Fesili ma Tali

1. O fea le nuu sa nonofo ai Iopu ma lana fanau?

Tali: O *Usa*

2. E toafia le fanau a Iopu?

Tali: *E toasefulu*

3. E toafia tama e toafia foi teine o le fanau a Iopu?

Tali: *Eto'afitu tama, ae to'atolu teine.*

4. Na a'oa'o e Iopu lana fanau i mea e manuia ai o latou olaga. Sa'o pe Sesē?

Tali: *Sa'o*

(E) Valivaliga Ata:Ia fai ni kopi o le ata ua saunia e tufa ile vasega e galulue ai.

PESE: (fati o le pese: “Lau lupe ua lele, lele i le vaomaoa”)

IOPU LE TAMA ALOFA

Iopu le tamā alofa
E a'oa'o lana fanau
O se tamā fa'atuatua
E mata'u i le Atua.
YEAH!!!

A'OA'OGA:

1. O Iopu le tamā alofa.
2. Fa'alogo lelei i a'oa'oga a matua i le Atua.
3. Ia fiafia e mafuta i lou aiga.

TATALO FAAIU:

Faafetai Tamā mo le aoga i lenei aso. Faafetai mo le mataupu manaia ua a'oa'o mai. A'oa'o mai pea i matou ina ia iloa ona usita'i ma faalogo i matua ma tagata matutua. Ona o Iesu le uo a tamaiti ua matou tatalo atu ai. Amene.

MANATU TAIALAO IUNI: O AMIOGA E TATAU MO FANAU

O lenei manatu taiala ma lona faamoemoe, e taua tele mo fanau i lo latou ola tuputupu a'e. O mataupu foi ua tapena i ai mo lenei masina o loo atagia ai amioega e tatau mo fanau. Ia a'oa'oina fanau i amio e tatau ma talafeagai e fa'aalia lea i soo se nofoaga e i ai. E le gata i totonu o aiga, aoga, nuu, Ekalesia ma soo se mea lava.

ASO SA:

04 IUNI 2017

**MATAUPU:
SAKAIO**

UA VALAAU IESU IA

SINI: Ia a’oa’o le vasega ia malamalama, na alofaina Sakaio e Iesu.

TUSI FAITAU:

Luka 19:1-10 (mo le Faiaoga)
Luka 19:8 (mo le Vasega)

“Faauta, le Alii e, o le a ou vaeluaina atu a’u mea i e matitiva; afai foi ua ou ave mea a se tasi i se auala pepelo, ou te tauai atu ai e taifa.”

FESOASOANI MO FAIAOGA:

Tamaiti o ai na a’e i le laau? Aisea na a’e ai Sakaio i le laau? O le a le igoa o le laau? Ia lelei tele tamaiti, popoto tele outou. Fai mai le tatou tala i lenei taeao, ua oo atu nei Iesu i Ieriko, ae ua omai le motu o tagata e fia faalogologo i a’oa’oga a Iesu. Sa i ai ma le tagata e igoa ia Sakaio i le nuu o Ieriko. O Sakaio, o le ao lafoga. O lana galuega, o le ao ina o tupe a tagata e ave mo le malo o Roma e fai ai isi a latou galuega. Peitai, e lei faamaoni Sakaio i lana galuega. Ua ia ave na o se vaega o tupe, ae tuu le isi vaega tupe ma ia. O le mafuaaga lea e inosia ai e tagata.

Na faalogo loa Sakaio ua sau Iesu i le latou nuu, tu loa i luga, ma su’e se auala e feiloai ai ia Iesu. Peitai, ua fiu si tamaloa e tau autilo Iesu, e le iloa atu ona o ia o se tagata puupuu ma saasaa. Ua a’e loa Sakaio i le laau o le sukamoru sa tu i tafatafa ane o le auala, ma ua iloa atu ai Iesu. Ua tilotilo a’e Iesu ma iloa atu

Sakaio ma vaalau atui ai. “Sakaio, alu ifo ia i lalo. O nanei, ou te alu atu ai i lou fale. “Ua fiafia tele Sakaio i le tala a Iesu, ma alu atu loa i lona fale e faatali mai ai Iesu. Ua taunuu atu Iesu i le fale o Sakaio, ma la mafuta ai loa. Na iloa lelei e Sakaio, e le fiafia Iesu i lana galuega o loo fai. Ua ia fai atu ia Iesu, “*Faauta, le Alii e, o le a ou vaeluaina atu a’u mea i e matitiva; afai foi ua ou ave mea a se tasi i se auala pepelo, ou te tau ai e taifa.*”

O Sakaio, o se tagata e le faamaoni, ae na alofa peai ai Iesu, aua na ia ta’utino ia Iesu lona le faamaoni i lana galuega sa fai. O le manao foi lea o Iesu mo tatou le fanau, ia tatou faamaoni ia tatou galuega e valaau ai i tatou i taimi uma.

GALUEGA FAATINO:

(A) Faatino le tala: Ia faatino faatasi e faiaoga ma le fanau le tala ina ia malamalama atili ai le fanau.

(E) Valivaliga Ata: Ia fai ni kopi o le ata ua saunia e tufa I le vasega e galulue ai.

PESE:

Sakaio se tagata puupuu

Sakaio se tagata puupuu saasaa

Le tagata puupuu saasaa

Sa ae o ia i le Sukamoru i tafatafa o le auala

O Iesu ua afio mai, tu loa ma fetalai

Sakaio alu ifo nei i lalo

Sau ta o i lou fale

Ua tele lou fia ulavale.

A’OA’OGA:

1. Na talia e Sakaio le valaau a Iesu.
2. Ia faamaoni ma tautala sa’o.
3. E lē faailoga tagata Iesu.

TATALO :

Faafetai le Atua lo matou Tamā, i lou a’oa’o mai pea ia i matou le fanau ina ia matou faamaoni i galuega ua valaauina ai i matou. Amene.

ASO SA:

11 IUNI 2017

MATAUPU: AGALELEI

O LE TAGATA SAMARIA

SINI:

Ia a’oa’o le vasega ia malamalama i le eseesega o amio na fa’aali e tagata e toatolu o loo aumai i le tala.

TUSI FAITAU:

Luka 10:30 - 35 (mo le Faiaoga)
Luka 10:33 (mo le Vasega)

“A o le tasi Samaria ua alu lana malaga, ua oo atu i le mea o lo o i ai o ia, ua iloa o ia, ona mutimuti vale lea o lona alofa,”

FESOASOANI MO FAIAOGA:

Sa I ai se tasi tamaloa mai Ieruselema, sa malaga aga'i i Ieriko. E lei alu le tamaloa lea i se taavale pe tietie foi i se solofanua, ae na savali. Na faateia lenei tamaloa i le osofai e tagata i le auala. Ua latou fasi ia te ia, ma ave uma ona ofu, ma faata'atia i le auala e oti ai.

E lei umi lava ae sau le ositaulaga. Na vaai mamao mai lava le ositaulaga i le tamaloa lea o loo taatia atu i le auala. Oka se leaga o lenei ositaulaga. E lei sau e fesoasoani, ae ua aga'i atu i le isi itu ala. E lei umi lava, ae sau le sã Levi ma tau mai i ai. Ua nã ona matamata lava o le sã Levi i ai, ma toe fa'auau lanamalaga. Mulimuli ane, ona sau ai lea o le tagata Samaria ma tau mai i ai, ona mutimutivale ai lea o lona alofa. Ua ia fusufusi i manua o le tamaloa, ma fa'atietie i lana asini, ona ave ai lea i le faletalimalo. Ua ia ave foi le tupe i le pule o le faletalimalo ma fai i ai, a i ai se isi mea e manaomia e le tamaloa lea, o le a toe sau i le aso e sosoo ai e totogi uma.

E ese le agalelei o le tagata Samaria a ea tamaiti? Na ia tau mai loa i le tamaloa lea, fesoasoani loa i ai e lei toe faatali. Ua lē pei o le ositaulaga ma le Sã Levi lea na tau muamua atu i ai. O uiga lelei ia na fa'aali e le tagata Samaria lea, o uiga lelei foi ia e manao le tatou uo o Iesu ia tatou faia mo soo se tagata lava e manaomia le fesoasoani. Aua o le galuega lelei e te faia mo le isi tagata e faia mai foi ia te oe i le taimi e te manaomia ai le fesoasoani.

UIGA O UPU MA FUAITAU:

- | | | | |
|-----|------------|---|---------|
| i) | ositaulaga | - | faifeau |
| ii) | sã Levi | - | faifeau |

- iii) tagata Samaria - tagata e sau mai i le nuu o Samaria.
iv) mutimutivale le alofa - mafatia le loto i le alofa

GALUEGA FAATINO:

- (A) Faatino le tala: faatino faatasi e faiaoga ma le fanau le tala ina ia malamalama atili ai le fanau.
Usu le pese ua tusia i lalo i le taimi e faatino ai le tala ma faailoa tamaiti o loo faatinoina vaega taitasi.

Valivaliga Ata: Ia fai ni kopi o ata ua uma ona saunia e galulue ai le vasega.

PESE: O le tagata Samaria (*fati: twinkle, twinkle little star*)

Ia ou pei o le tagata Samaria
E agalelei i tagata mafatia
Le ositaulaga matua'i leaga
Ua toe oso ese i le isi auala
Le sa Levi ua tu ma matamata
Ua pei o amio a le tama o le ata

A'OA'OGA:

1. Ia tatou fesoasoani i tagata puapuagatia.
2. Ia faalogo ma usita'ii a'oa'oga a Iesu.
3. Ia tatou alolofa ma agalelei atu i isi..

TATALO :

Le Atua lo matou Tamā, faafetai mo le tala manaia i lenei taeao. A’oa’o mai pea i matou ina ia matou agalelei atu i isi e pei o le Samaria agalelei. Amene.

ASO SA: 18 IUNI 2017

**MATAUPU: UA TALIA E FARAO LE
AIGA O IOSEFA**

SINI: Ia a’oa’o le vasega ia iloa ona faia mea lelei mo soo se tagata e manaomia le fesoasoani, e faapei ona faia e Farao mo le aiga o Iosefa.

TUSI FAITAU: Kenese 47:1-12 (mo le Faiaoga)
Kenese 47: 6 (mo le Vasega)

“o loo i ou luma lava le laueleele o Aikupito, ia e tuuina atu lou tamā ma ou uso ia nonofo i le fanua e sili ona lelei;”

FESOASOANI MO FAIAOGA:

O ai foi Iosefa tamaiti? Ia lelei tele o Iosefa o le atalii o Iakopo ma e toasefulu tasi ona uso, ma sa nonofo i latou i le nuu lea o Kanana. O Iosefa foi, o le pele lea a le toeaina o Iakopo, ma o le ala foi lea e inosia ai o ia e ona uso.

Ua tupu nei le oge i le nuu lea o Kanana, le nuu lea e nonofo ai Iakopo ma lana fanau. Ua leai ni meaai. Ona faapea loa lea o Iakopo i lana fanau; e sili pe a tatou o i Aikupito e tele meaai ma

maua ai ni vao e fafaga ai a tatou manu aua ua tele le oge iinei i Kanana. Ua o nei Iakopo ma lana fanau ma ua taunuu atu i Aikupito, faapea lava latou a nei a tutuli ese latou e Farao. Ua o atu ua nonofo i le nuu lea o Kosena ma ua sau i ai Iosefa le latou uso ma faafeiloai i lona tamā ma ona uso.

Ua fai atu Iosefa i lona tamā, e sili pe a tatou o e ta’u ia Farao pe mafai ona tou nonofo iinei. Ua popole lava le toeaina o Iakopo auā e lei iloa pe talia o ia ma lana fanau e Farao. Peitai tamaiti, e ese le agalelei o Farao, na avea le alofa o Farao ia Iosefa ua alofa ai foi i le tamā o Iosefa ma lona aiga. Na talia ma le fiafia e Farao Iakopo ma lona aiga e nonofo i Aikupito. Ua faatonu foi e Farao Iosefa e ave Iakopo ma lana fanau i le fanua lea e igoa o Kosena, ma o le fanua pitosili lea ona lelei mo faatoaga ma lelei le vao e fafaga ai a latou lafumanu. Ae le gata i lea, ua ave foi i ai e Farao meaai ma mea uma e manaomia mo Iakopo ma lana fanau.

O le faamaoni o Iosefa ia Farao i le taimi na nofo ai i Aikupito, lea lava ua alofagia ai le aiga o Iosefa e Farao. O le a’oa’oga taua foi lea mo tatou le fanau, o au galuega lelei e faia mo isi tagata, e le gata e alofagia ai oe ae faapena foi ona alofagia ai lou aiga. A tatou usitai foi ma faalogo i matua, faiaoga, ma tagata matutua, e le gata e alolofa ai tagata ia te oe, e faia foi soo se mea lava e te manao i ai.

UIGA O UPU:

- i) faapito: - o le upu lea o loo faasino ia Iosefa. E alofa Iakopo i lana fanau uma lava, peitai e sili atu lona alofa ia Iosefa. O mea lelei uma foi e ave uma mo Iosefa.
- ii) oge: - leai ni meaai.

- iii) fanua laulelei - fanua manaia, tele laau e ola ai, lelei le vao mo manu, lelei le fanua e fau ai fale, lelei le palapala e fai ai faatoaga.
- iv) Ramese - O le fanua laulelei lea na ave e Farao mo Iakopo ma lana fanau e nonofo ai.

GALUEGA FAATINO:

(A) FESILI MA TALI

1. E toafia uso o Iosefa?

Tali: E toasefulu tasi

2. Aisea na o ai le aiga o Iakopo i Aikupito?

Tali: E fia maua ni meaai ua tetele le oge i Kanana

3. Na talia e Farao le aiga o Iosefa?

Tali: Ioe na talia lelei ma ave i ai le fanua e nonofo ai ma lana fanau.

4. O le a le uiga o le oge tamaiti?

Tali: E leai ni meaai.

(E) Valivaliga Ata: Ia fai ni kopi o ata ua uma ona saunia e galulue ai le vasega.

PESE: O le alofa o se e te faasoa atu

O le alofa o se mea e te faasoa atu
Faasoa atu, faasoa atu

Le alofa o se mea e te faasoa atu
Ae toe fo'i mai i se aso
E faatusaina i se tupe itiiti
Taofi mau e leai se faasili
Tufatufa atu ma faasoa atu
Ae toe fo'i mai i se aso

Love is something that you give it away
Give it away, Give it away
Love is something that you give it away
And it comes right back to you
It's just like a magic penny
Hold it tight and you won't get any
Lend it, spend it give it away
And it comes right back to you.

A'OA'OGA:

1. Ia talia ma le fiafia tagata i lou fale.
2. Ia agalelei i tagata e manaomia lau fesoasoani.
3. E alofagia tagata e faia mea lelei mo isi tagata.

TATALO :

Faafetai Iesu mo a'oa'oga manaia ua matou maua i lenei taeao.
A'oa'o mai pea i matou ia matou fiafia e faalogo i Lou a'oa'o
mai i mea e manuia ai matou le fanau. Ona o Iesu le uo a tamaiti
ua ala atu ai lenei tatalo. Amene.

ASO SA:

25 IUNI 2017

**MATAUPU:
SO'O**

UA A'E LE FAIVA O LE AU

SINI:

Ia a’oa’o le vasega ia malamalama, i le ola galulue fa’atasi e pei ona fa’aalia mai i le tala lea i le au so’o ma lo latou faiva.

TUSI FAITAU:

Luka 5:4 – 7(mo le Faiaoga)
Luka 5: 7 (mo le Vasega)

“Ua latou genogeno atu i o latou o i le tasi vaa, e o mai e fesoasoani ia te i latou; ona latou omai lea, ua fa’atumu e i latou vaa uma e lua, ua tali gogoto ai.”

FESOASOANI MO FAIAOGA:

Ao i ai Iesu i luga o le auvai, sa fai ai lana aoga i tagata na mulimuli atu ia te ia. I luga o le auvai leai, sa taula ai vaa-fagota e lua. O le isi vaa ua fo’i mai lo latou faiva, o loo fufulu a latou upega e leai ma ni i’a na maua ai. O loo i ai foi ma le vaa o Simona Peteru, o le tasi o soo o Iesu, ua fo’i mai foi lana faiva, e leai fo’i ni ia na maua ai.

Ua valaau atu Iesu ia Simona, ina ia tuutuu mai lona vaa i uta sei tietie ai ma a’oa’o atu i le motu o tagata. Na uma loa le aoga a Iesu, ona fai atu lea ia Simona e tuutuu atu le vaa i le mea loloto ma lafo le upega i lalo. Ua fai mai Simona ia Iesu, “se Iesu, ua alu le po atoa e leai ma se ia na maua, peitai, ona o lau fetalaiga, lea o le a toe lafo ai le upega.” Ua lafo loa le upega a Simona i lalo; ona toe fai atu lea o Iesu, ”Ia toso mai loa i luga. Tou te iloa tamaiti; oka se tele ma le anoanoa’i o ia ua le mafai ona faitau. Ua tumu le vaa i i’a ua tau goto ai ma le vaa, ma ua

manaomia se isi vaa e fesoasoani ia i latou. Manatua foi tamaiti, o lea e i ai ma le isi vaa i le mea lava lea e i ai Iesu.

Ua genogeno atu loa Simona i le isi vaa ia fesoasoani mai ia i latou. Ua tuu ese e le auvaa lea a latou upega, ae ua omai e fesoasoani ia Simona. Ua tuutuu mai la latou vaa ua latou galulue faatasi ai i le auauina o le upega. Oka oka se tele o i'a tamaiti, ua tau fai tutumu uma vaa e lua. Semanu lava e maumau isi i'a aua ua lē ofi le vaa o Simona, peitai, ua faigofie ona o le fesoasoani a le isi auvaa.

Ua tau fai ofo uma tagata na i ai i lea nofoaga, faatasi ai ma le aufaifaiva i lenei vavega na faia e Iesu. O le vavega lea na faia e Iesu, e le gata ua iloa ai e tagata le Silisili ese o Iesu, ae ua a'oa'oina ai foi le au fai-faiva ia galulue faatasi, aua a galulue faatasi, e faigofie ai se galuega, ma manuia uma ai i latou ma o latou aiga.

UIGA O UPU:

- i) auvai - o le laueleele matutu i luga ae o le vai.
- ii) anoanoa'i - tele o i'a, ua le mafai ona faitau.
- iii) auvaa - tagata o loo i luga o le vaa.
- iv) genogeno - talotalo ma faailoa atu i le isi tagata e aunoa ma le leo.
- v) auauina o le upega - aveeseina lea o otaota ma amu o loo pipii i le upega faagota ma fufulu.

GALUEGA FAATINO:

Valivaliga Ata: Ia fai ni kopi o le ata ua saunia e tufa i le vasega e galulue ai.

PESE:

Afai tatou te galulue faatasi
Faatasi, faatasi
Afai tatou te galulue faatasi
Ona fiafia ai lea
O lau galuega
O la'u galuega
Tatou galulue mo le Atua
Afai tatou te galulue faatasi
Ona fiafia ai lea

When we all work together
Together, together
When we all work together
How happy we'll be
It's your work
It's my work
It's our work
It's God's work
When we all work together
How happy we'll be.

A'OA'OGA:

1. E faigofie se galuega pe a galulue faatasi.
2. E manuia uma i tatou pe a fai faatasi se galuega.
3. Fiafia e faasoa atu manuia e te maua.

TATALO FAAIU:

Le Atua lo matou Tamā, ua matou fiafia lava i lenei taeao, manaia le tala ua faia mo matou. Faafetai i lou a’oa’o mai ia i matou ina ia matou galulue faatasi i soo se mea, e faigofie ai mea uma. Faamanuia i faiaoga ma tamaiti uma lava. Ona o Iesu le uo a tamaiti ua ala atu ai le tatalo. Amene.

MANATU TAIALAO IULAI: E ‘AU LE ATUA MA I TATOU

O le Atua lava ia o le Atua e alofa, e auai o Ia i ona tagata i soo se taimi, aemaise lava i taimi e feagai ai i tatou ma puapuaga o lenei olaga. O mataupu ua filifilia mo lenei masina, o loo atagia ai le mafuta mai pea o le Atua i le soifuaga atoa o le tagata. Ua i ai foi le faamoemoe ia a’oa’oina ai le fanau ia latou iloa atili le Atua, o lo tatou Faaola lava ia, ma e lē uma lona alofa i le tagata na Ia faia. O galuega lelei foi ua vaaia i tagata autu o loo i mataupu taitasi, o le Atua lava ia na Ia faia.

ASO SA: 02 IULAI 2017

MATAUPU: IOSEFA LE TAMA ALOFA

SINI: Ia a’oa’o le vasega ia malamalama, o Iosefa o se tama loto alofa ma loto faamagalō.

TUSI FAITAU: Kenese 43:15-23(mo le Faiaoga)
Kenese 43: 16 (mo le Vasega)

*“Au mai ia o na tagata i le fale,
ma ia fasi ni manu, ma ia sauni,*

*aua matou te aai ma ia tagata pe
a oo i le aoauli.”*

FESOASOANI MO FAIAOGA:

O Iosefa le tama na agaleaga i ai ona uso, lea na latou o faatau, ma oo atu ai lava i Aikupito. Ia o Iosefa tonu lava lena o loo ta'u mai i le tatou tusi faitau i lenei taeao. Ua malosi tele le oge i le nuu o Kanana, o le nuu lea o loo nonofo ai le tamā o Iosefa ma ona uso. E pau lava le nuu lea e tele ai meaai, o Aikupito, ao le nuu tonu lava lea o loo i ai Iosefa; ae le o iloa lava e le aiga o Iosefa, o le latou uso lea e vaaia meaai i Aikupito. Na o muamua foi uso o Iosefa i Aikupito e aumai ni a latou meaai, ae e lei faailoa lava i ai e Iosefa, o ia o le latou uso.

Ua alu le malaga i Aikupito e pei ona faatonu e Iakopo lo latou tamā. Peitai, na o atu ae fai i ai Iosefa, ia latou toe foi e aumai lo latou uso laititi o Peniamina. Na faateia le fanau a Iakopo i le iloa e Iosefa, e i ai le isi o latou uso. O le mana'o o Iosefa ia latou omai muamua ma Peniamina, ona toe avatu ai lea o meaai ma latou. Na toe foi tama ma aumai Peniamina ona o le mana'o o Iosefa. Ua toe agalelei foi i ai Iosefa, ua ia faatonu ana auauna e tapena le fale ma sauni le meaai e aai ai ona uso.

Na uma ona tapena lelei le meaai, ona toe tapena foi lea o meaai e toe foi ma latou i Kanana. E ui lava i le agaleaga na faia e ona uso ia te ia, peitai, na alofa pea i ai ma ia faamagalalo i ai. Na faagalalo uma e Iosefa lea agaleaga ona o lona alofa i le mafatia ua feagai ma i latou ona o le oge. Ae le gata i lea, e le o ni tagata ese, a o ona lava uso. O uiga lelei ia o Iosefa, o loo a'oa'o mai ai i tatou le fanau; o loo i ai lava le Atua i mea uma tatou te faia. O le i ai o le Atua ia Iosefa, lea lava ua ia lē taui atu ai le amio leaga i le leaga, ae ua ia faia pea le alofa.

GALUEGA FAATINO:

A) Valivaliga Ata: Ia fai ni kopi o ata ua uma ua saunia e tufa i le vasega e galulue ai.

PESE: (*fati: E pei o se teu fugalaau*)

Iosefa o se tama alofa
E agalelei i taimi uma
Faaso atu le tamaoaiga
I lona aiga.

Iosefa o se tama alofa
E loto faamagalo i taimi uma
E le tau ma sui i lona aiga
Ae na ia taliaina.

A’OA’OGA:

1. Aua le tau atu le leaga i le leaga.
2. O Iosefa o se tama loto faamagalo.
3. Ia alofa ma le faamaoni i lou aiga.

TATALO:

Ia viia pea lava lau afio le Atua lo matou tama. Faafetai i lou faailoa mai o lou alofa ia i matou le fanau, ia matou manatua pea i aso uma o lo matou ola. Ona o Iesu la matou uo ua ala atu ai le tatalo. Amene.

ASO SA:

09 IULAI 2017

**MATAUPU:
TAU**

O KITIONA MA LANA AU-

SINI:

Ia a'oa'o le vasega ia malamalama, na auai le Atua ia Kitiona i le filifiliina o le au-tau e tau ma Mitiana.

**TUSI FAITAU:
Faiaoga)**

Faamasino 7:1 – 8 (mo le

Vasega)

Faamasino 7: 7 (mo le

“Ona fetalai mai ai lea o le Alii ia Kitiona, o le toluselau o tagata e na etoeto i le vai, ou te faaola ai ia te outou;”

FESOASOANI MO FAIAOGA:

O le tala lea tamaiti e ta'u mai i le Tusi Paia i lenei taeao, o le tala i le filifiliina o au-tau a Kitiona. O le au-tau lea a Kitiona tamaiti, na sauni e tau ma le au a Mitiana. O Mitiana o le tasi lea o nuu e ita tele i ai Isaraelu, aua na o mai muamua susunu o latou fale ma ave uma a latou meaa. O lea la ua sauni Isaraelu e sii le taua ia Mitiana. Ua silasila mai le Atua, e toatele na'ua tagata o loo ia Kitiona. Na faatonu loa e le Atua Kitiona ia tautala atu i le nuu. O latou uma lava ua fefefe ma palaaai, ia toe foi i o latou aiga.

E luasefulu ma le lua o afe (22,000) tagata sa ia Kitiona i le amataga, ae na o le sefulu afe (10,000) na nonofo, aua ua palaaai

le isi toatele. O le sefulu afe la lea o tagata ua ave e Kitiona i le vai e pei ona faatonu mai le Alii ia Kitiona. Ua feinu ai, ma o le auala lea na tofotofoina ai e le Atua le nuu. O isi tagata ua feinu etoeto i o latou laulaufaiva, o isi ua faatutu ma asu a'e le vai i o latou lima, ao isi ua punonou ma feinu. O tagata uma la na etoeto ma tagata na faatutu ma asu ae le vai i lima, e na o le toluselau. Peitai, o le toatele o le nuu na punonou ma feinu, o latou uma ia na toe foi i o latou aiga e lē aoga i le taua.

I le 22,000 o le nuu na sauni mo le taua, e nā o le toluselau tagata na silafia e le Atua, e aoga i le taua. O le faailoga lea o le alofa o le Atua ia Kitiona ma le nuu o Isaraelu, lea lava ua ia faailoa ia Kitiona, e toatele tagata e lē manaomia. Ia ave lava na o tagata e iloa e mautinoa ai le manumalo o le latou au tau. O le Atua lava ia o le Atua alofa, o ia e fasino mai i tatou le fanau i mea e tatau ona tatou faia, o mea foi e aoga ma manuia ai i tatou, e pei foi ona ia faasino ia Kitiona. O le Atua foi lea e au pea mo i tatou, ina ia tatou manumalo pea i soo se faigata o lenei olaga.

UIGA O UPU MA FUAITAU:

- i) Ierupaala - Kitiona.
- ii) oge - leai ni meaai.
- iii) tofotofoina - suesue, sailiili.

GALUEGA FAATINO:

Valivaliga Ata: Ia fai ni kopi o le ata ua saunia e tufa i le vasega e galulue ai.

“Ona fa’aloaloa lea e Mose o lona lima i luga i le sami, ona faatafeeseina lea e le Alii o le sami i le matagi tele mai sasae i lea po atoa; ua ia faia foi le sami ma eleele matutu, ua vaeluaina lava le sami.”

FESOASOANI MO FAIAOGA:

E ese le alofa o le Atua i lona nuu o Isaraelu. Na silafia lava e le Atua le pologa o Isaraelu i Aikupito, ona ia valaau lea ia Mose ma Arona e o e aveese mai lona nuu. Na malie lava Farao e tuu mai le nuu e o, peitai, na toe tuliloa mai lava e fitafita ma a latou solofanua ma kariota. Ua fefefe le nuu uma aua o lea ua tuliloa atu i latou e Farao ma ana au. Ua valaau atu Mose i le Atua aua ua le iloa e ia le mea o le a fai.

O lea ua oo mai le nuu i le sami ulaula, ua leai lava se isi ala e ui ai. E lē mafai foi ona toe foi i tua aua o loo tuliloa mai i latou e Aikupito. Ua fetalai mai le Atua ia Mose, ina ia sii i luga lona tootoo ma faaloaloa, ona vaeluaina ai lea o le sami. E ofoofogia le mea na tupu. Na sau le matagi tele mai sasae ma faatafe ese ai le sami, ma ua vaeluaina ai. Ua iloa atu le eleele matutu, ona savavali ai lea o le fanauga a Isaraelu e oo atu ai i le isi itu. E tiga lava le ofoofogia o le vaaiga lea ua vaai atu i ai fitafita o Aikupito, ae e lei toe foi ai lava. Ua o atu pea fitafita ma tuliloa atu le nuu, peitai, e lei oo Aikupito i le isi itu, aua na malelemo uma i le sami ulaula.

Tamaiti, o le vaaiga matautia lea na faia e le Atua i le sami ulaula, lea na fa’aaoga ai le tootoo o Mose. E faigofie mea uma i le Atua. E leai lava se mea e faigata ia te ia. O le a’oa’oga taua foi lea mo i tatou le fanau. Ai ai lava se mea tatou te manao ai, ia

tatou valaau atu i le Atua e fesoasoani mai pea iai tatou. Atatou mama'i foi, ia tatou valaau i le Atua e ala i le tatalo, ona faatea lea e le Atua o o tatou ma'i uma. Na ia vaeluaina le sami ulaula, e leai foi se mea e lē mafai e ia ona fai.

UIGA O UPU:

- i) tuliloa - mulimuli atu i tua
- ii) faamaaaina - faatupuina pea le ita.
- iii) sami ulaula - sami tele, sami loloto.
- iv) ofoofogia - se vaaiga e ofo ai le loto, o se vaaiga e le masani ona tupu, o se vaaiga e lē mafai ona faia e se tagata soifua.

GALUEGA FAATINO:

(A) Faatino le tala e faiaoga ma tamaiti – fesoasoani le faiaoga e faitau le faasologa lea o le tala ae faatino e le fanau.

1. Ona o ese ai lea o Mose ma Israelu mai Aikupito
2. Ua alu le malaga ua oo atu i le sami ulaula
3. fefefe le nuu aua o loo tuliloa mai e Aikupito
4. Ua valaau Mose i le Atua e fesoasoani mai
5. Ua fetalai le Atua ia Mose
6. **Atua** – Mose tuu i luga lou tootoo ma faaloaloa i le sami
7. Ua tuu i luga le to'oto'o o Mose ua vaeluaina le sami
8. Ua vaeluaina le sami, ua savavali ai Israelu
9. Ua omai pea Aikupito e tuliloa mai
10. Ua malelemo uma Aikupito i le sami

(E) Valivaliga Ata: Ia fai ni kopi o le ata ua saunia e tufa i le vasega e galulue ai.

PESE:
of the Lord)

(fati – I want to be a soldier in the army

E faapefea na sopoia e Mose o le sami
E faapefea na sopoia e Mose o le sami
E faapefea na sopoia e Mose o le sami
O le Atua na vaeluaina o le sami

Mose tuu i luga o lou to'oto'o
Mose tuu i luga o lou to'oto'o
Mose tuu i luga o lou to'oto'o
Ma vaeluaina ai le sami loloto.

A'OA'OGA:

1. O le mana o le Atua na vaeluaina ai le sami.
2. E alofa le Atua ia Isaraelu lona nuu.
3. E ofoofogia mea e faia e le Atua.

TATALO :

Faafetai tele le Atua mo le mataupu manaia i lenei taeao. Ua matou iloa o lou mana lava na vaeluaina ai le sami ulaula. Faafetai i lou alofa mai pea ia i matou le fanau. Faamanuia i faiaoga ma tamaiti, ona o Iesu le uo a tamaiti ua matou tatalo ai. Amene.

ASO SA:

23 IULAI 2017

**MATAUPU:
TAVITA**

O LE UO A IONATANA MA

SINI:

Ia a'oa'o le vasega ia malamalama, e alofa Ionatana ia Tavita, e faapena foi Tavita ia Ionatana.

**TUSI FAITAU:
Faiaoga)**

1 Samuelu 20:35-42 (mo le

Vasega)

1 Samuelu 20:42 (mo le

*“Ia i ai le Alii i le va o a'u ma oe,
i le va foi o la'u fanau ma lau
fanau e faavavau.”*

FESOASOANI MO FAIAOGA

O tala leni tamaiti i le faigāuo a Ionatana ma Tavita. O Tavita, o lona tama e igoa ia Iese, o le leoleo mamoe o ia. Sa nofo Tavita i le fale o le Tupu o Saulo, le tamā o Ionatana, ona e fiafia e pese ma ta lana kitara. Ma o Saulo e fiafia lava e faalogologo i pese a Tavita e faate'a ai lona ita.

Ona oo lea i le isi aso, ua mana'o Saulo e alu Tavita i le taua. Ua fo'i mai le taua, ua manumalo le au a Isaraelu ona o Tavita. Ua fiafia tagata ia Tavita, ma ua tupu ai le loto tigā o Saulo. Na amata mai ai loa iina ona ita Saulo ia Tavita, peitai, na alofa pea Ionatana ia Tavita lana uo.

Na taumafai Saulo e fasioti ia Tavita, ae lei mafai lava, ona e faalafi e Ionatana lana uo. Ua le mafai e Ionatana ona toe faalafi

ia Tavita ona ua ita tele lona tama. Ona fai lea o le tonu, e alu Tavita i le vao e lafi ai, ae sei alu e faamalie le loto o lona tama ina ia alofa pea ia Tavita. Peitai, e lei mafai lava Saulo. Na fai lea o le tonu a Ionatana ma Tavita, ia lafi pea Tavita i le vao. A faapea e fana atu le ū ae leai se isi e alu atu e aumai, ona toe fo'i mai lea. Ae a faapea e fana atu le u ae tuli atu le tama e aumai, ona alu mamao loa lea ona o loo ita pea lona tamā. Ua fana nei le ū, ma ua tuli le tama e aumai, ma ua iloa ai e Tavita le mea ua tupu. Ona alu ane lea o Ionatana i le vao ma su'e ia Tavita. Ona la fetagisi lea ma faamavae, aua o le a ō eseese i laua. Ona fai atu lea o Ionatana ia Tavita, ia i ai pea le Alii i lo ta va, e faapena foi i a ta fanau e faavavau.

Ona alu ai lea o Tavita, ae ua nonofo pea Ionatana ma lona tamā, aua e le i mafai ona nofo pea Tavita ona o Saulo. O le alofa o Ionatana ia Tavita, na ia faasola ai i le vao, ma lo la talitonuga, e faatasi pea le Alii iai laua. O le alofa foi o Tavita ia Ionatana, na ia alu ese ai, ina ia aua nei ita Saulo i lona atalii o Ionatana. O le aoaoga lelei foi lea mo i tatou le fanau. A e alofa i lau uo, ia aua lava nei faia se mea e ita ai matua o lau uo ia te oe, faapena foi i lau uo. A iloa loa ua oo i le taimi e fai ai feau i le aiga, ia aua nei tata'i mai lau uo e te lua tafafao, ae tuu e alu e fai sana feau sei oo foi i le taimi e tatau ai ona lua o e tafafao. O Iesu Keriso lava ia o le uo lea a tamaiti, e iai pea o ia i taimi uma, i soo se mea e puipui i tatou le fanau.

GALUEGA FAATINO:

Valivaliga Ata: Ia fai ni kopi o le ata ua saunia e tufa i le vasega e galulue ai.

PESE: (fati: Tagata poto na fau lona fale i luga o le papa)

O Iesu o ia o le tatou uo sili
O Iesu o ia o le tatou uo sili
O Iesu o ia o le tatou uo sili
E alofa mai pea i aso uma

E i ai pea o Ia i aso uma lava
E i ai pea o Ia i aso uma lava
E i ai pea o Ia i aso uma lava
I aso uma o lou olaga.

A’OA’OGA:

1. Ia alofa i lau uo.
2. Ia fesoasoani i lau uo pe a manaomia le fesoasoani.
3. O Iesu le uo silisili a tamaiti.

TATALO :

Faafetai le Atua lo matou Tamā, ua uma la matou aoga. Faafetai mo a matou uo e fesoasoani mai i taimi e manaomia ai le fesoasoani. Amene.

ASO SA:

30 IULAI 2017

**MATAUPU:
TOATOLU**

O TAMA LOTOTETELE E

SINI:

Ia a'oa'o le vasega ia malamalama, na lafo tama i le ogaumu aasa, ae lei mu, ona sa i ai faatasi ma le Atua.

**TUSI FAITAU:
Faiaoga)**

Tanielu 3 : 21 - 27 (mo le

Tanielu 3 : 25 (mo le Vasega)

“Faauta, ua ou iloa tagata e toafa, ua tatalaina, ua feoi i totonu o le afi, ua le afaina lava i latou; ua tino mai lona toafa ua pei o se alo o le Atua.”

FESOASOANI MO FAIAOGA:

Sa i ai se tupu e igoa ia Nepukanesa, o le tupu o Papelonia. Sa pule ia Isaraelu i na onapo. O se tupu e tapuai i tupua. Na fai e Nepukanesa le tupua tele lava, o le faatusa o ia, ma lana faatonuga, ia ifo uma iai tagata. Ona oo lea i le isi aso, ua faapea atu le tupu i tagata uma, a ili loa pu ma ta meafaili, ona ifo uma lea o tagata i le tupua lea. Peitai, o tama ia e toatolu o Sataraka, Mesako ma Apeteniko, o tagata e talitonu i le Atua. E lē ifo i ni tupua. Na ifo uma tagata i le tupua, ao tama nei, ua le ifo i le tupua o Nepukanesa. Ona ita tele ai lea o le tupu, ma ua ia faatonu i fitafita ia saisai tama nei ma lafo i le ogaumu aasa.

Ua lē suia lava le mafau o le tupu ona o lona ita tele. Ona omai lea o fitafita ua matua'i fa'aaasa le ogaumu e tusa ai ma le faatonuga a Nepukanesa le tupu. Ua saisai i tama ma lafo loa i le ogaumu aasa. Talofa e, i nai tama matua'i le alofa tele lenei tupu. Ua tilotilo atu Nepukanesa, e leai ma se tasi o tama nei o mu i le afi. O loo feofeoi mai lava i totonu o le ogaumu, e lē o mu foi o latou ofu i le afi. Peitai, e vaai atu Nepukanesa, ua i ai ma le tagata e toatasi, o loo tutu faatasi ma tama nei e toatolu. ***O ai la se tamaititi na te ta'u mai, o ai le tagata lea?*** Ia lelei tele. O le agelu a le Atua. O iina na lagona ai le fefe o le tupu o Nepukanesa, ma ua valaau atu loa i tama, "Sataraka, Mesako ma Apeteniko, o auauna a le Atua Silisili, omai ia ina omai i fafo." Ona o mai ai lea o tama i fafo mai i le ogaumu aasa, e leai ma se isi na mu pe mu foi o latou ofu.

Ia o le tatou tala lena. O le a'oa'oga taua foi lea mo i tatou le fanau. A faaosoosoina i tatou e isi tamaiti e fai se mea e te iloa e le fiafia mai i ai le Alii, ia e loto toa e pei o Sataraka, Mesako ma Apeteniko, ma fai atu i ai e leai, ona e le fiafia i ai Iesu. O Iesu lava ia o le uo a tamaiti, e faatasi mai pea o ia i taimi uma lava e manaomia ai e i tatou le fesoasoani, e pei foi ona i ai ia Sataraka, Mesako ma Apeteniko.

GALUEGA FAATINO:

(A) Faatino le tala.

(E) Valivaliga Ata: Ia fai ni kopi o le ata ua saunia e tufa i le vasega e galulue ai.

PESE: (fati: Afai ua e fiafia pati pati ou lima)

Sataraka, Mesako ma Apeteniko.... HE! HA!

Sataraka, Mesako ma Apeteniko....HE! HA!

O tama uma na, o auauna a le Atua

x2

E le'i fefefe ia Nepu-ka-ne-sa.

Sataraka, Mesako ma Apeteniko.....HE! HA!

Sataraka, Mesako ma Apeteniko.....HE! HA!

Le ogaumu e aasa, ua lafo iai tama

x2

E lei mu, na faasaoina e le Atua.

A'OA'OGA:

1. Aua le ifo i tupua.

2. Ia talitonu ma faatuatua i le Atua.

TATALO :

Faafetai Iesu mo le mataupu manaia. Faamanuia i faiaoga ma tamaiti. Ona o Iesu le uo a tamaiti ua ala atu ai la matou tatalo. Amene.

MANATU TAIALA O AOKUSO: LE OLA

O LE ATUA O

Ua filifilia le manatu taiala e pei ona taua i luga, e a'oa'oina ai le fanau i nisi o mea na tutupu i auauna a le Atua, ae na mafai ona lavea'ima faasaoina mai o latou ola e ala i le faatuatua ma talitonu i le Atua.

ASO SA:

6 AOKUSO 2017

MATAUPU:**NA MAUA MOSE I LE VAI****SINI:**

Ia a'oa'o le vasega ia
malamalama, o Mose na maua i le vai

TUSI FAITAU:

Esoto 2: 1 – 10 (mo le Faiaoga)

Esoto 2: 6 (mo le Vasega)

*“Ua ia tatalaina, ua iloa ai le
tama, faauta foi, ua tagi le tama,
ona alofa ai lea i ai”*

FESOASOANI MO FAIAOGA:

Tamaiti, o ai na taina le papa? Ioe, o Mose. O le tatou tala lea o le a tatou talanoa i ai, o le tala i le fanau mai o Mose. O le tamaloa e igoa ia Amaramo ma le fafine e igoa ia Iokapeta, o matua ia o Mose, Arona ma lo la tuafafine o Miriama. Ina ua fanau mai le tama o Mose, ua oo ina tolu masina o Mose talu ona fanau mai, ona nana lea o Mose i le ato kome, ma ave i le auvai o le vaitafe, ona o le taimi tonu lava lea na fanau mai ai Mose, o le taimi lena o le tulafono a le tupu sauā o Farao, a fanau mai se tama, ia fasioti. Ae a fanau mai o se teine, ia faaola. O le mafuaaga lena na nanā ai Mose i le ato kome ma ave i le auvai o le vaitafe. A ua tu mamao atu Miriama le tuafafine o Mose, ma vaai atu i le tafetafea o le ato kome, o loo i ai si ona tuagane i le auvai o le vaitafe.

E lei umi, ae o ane loa le taelega a le afafine o Farao ma ana auauna teine i le auvai o le vaitafe. Ua latou iloa atu le ato kome o loo tafetafea mai i le isi pito o le auvai. Fai atu loa le afafine a Farao i le isi ana auauna fafine, e alu e aumai le ato kome. Ua aumai, ona tago atu lea o le afafine o Farao ua tatala le ato kome, ma iloa ai le pepe tama o loo taoto i totonu o le ato kome,

ua tagi lava o ia. Fai atu loa le tuafafine o Mose i le afafine o Farao, o le a ou alu e saili mai se fafine failele o Eperu na te tausia le pepe. Ona ave ai lea o le pepe i lona tinā ma tausi ia te ia. Ua matua le tama, ona toe faafoi ai lea o ia i le afafine o Farao e fai ma ana tama. Ona faaigoa ai lea o ia ia Mose, o lona uiga, “Auā na ou toina a’e o ia nai le vai.”

GALUEGA FAATINO:

Valivaliga Ata: Fai ni kopi o le ata ua saunia e tufa i le vasega e galulue ai.

TAULOTO: Mose Mose tiai i le vaitafe
A fanau mai se tama fasioti ma ave esē
A fanau mai se teine, ia faapelepelē
Alu le malaga a Mose ma le nuu o

Israelu

Tuli mai e Farao faatasi ma latou pelu
Sopoia le sami, Israelu ua latou laki
Talofa ia Aikupito, ua oti i le sami

A’OA’OGA:

1. Ua faasaoina Mose mai i le pule sau a Farao
2. Ua alofa le afafine o Farao ia Mose.

TATALO:

Faafetai le Atua i lou alofa ma lou agalelei mo i matou lau fanau. Ia maua se viiga o oe Iesu. Amene

ASO SA: 13 AOKUSO 2016 (ASO SA TAMĀ)

MATAUPU: O NOA LE TAMĀ
FAATUATUA

SINI: Ia a’oa’o le vasega ia malamalama, o le faatuatua o Noa i le Atua, na mafai ai ona faasaoina mai o ia ma lona aiga i le lolo

TUSI FAITAU: Kenese 8: 15 - 20 (mo le Faiaoga)
Kenese 8: 20 (mo le Vasega)

“Ona faia lea e Noa o le fata faitaulaga i le Alii, ua aveā foi e ia nisi manu i manu vaefa uma e mamā, ma manu felelei uma e mamā, ua ia fai a’i taulaga mu i le fata”

FESOASOANI MO FAIAOGA:

Tamaiti, o ai na fau le vaa? Lelei. O Noa, a ea?. O Noa, o ia o se tamā e faalogo, usita’i ma talitonu i le Atua. E toatolu lana fanau tama. O Semu, Hamo ma Iafeta. Na faatonu e le Atua Noa ia fau se vaa ona o le a sau le lolo aua ua iloa e le Atua ua amioleaga tagata o loo ola i le lalolagi. Ona usitai lea o Noa, ma ua ia fau ai loa le vaa. Ua faataunuu uma e Noa galuega na manao ai le Atua na te faia.

Ua uma na fau le vaa, ona ave lea i ai o manu i ituaiga eseese, faatasi ai ma Noa ma lana fanau. Ua faatupu e le Atua le lolo ma

faaumatia ai tagata sa i ai i le lalolagi, ae ua faasaoina mai lava nao Noa ma lona aiga, faatasi ma manu na ave i le vaa.

Ua uma le lolo, ona fetalai atu lea o le Atua ia Noa, “Ia ulufale atu i fafo ma le vaa, o ia ma lona aiga, faatasi ma manu uma na ave i le vaa, ia tupu tele lava i le lalolagi, ia fanafanau, ma ia uluola ai le lalolagi.” Ona faia lea e Noa e tusa ma le manao o le Atua. Ua ia a faia lea le fata faitaulaga ma, osi ai le taulaga i le Alii. Ua ia ave manu vaefa mama, ma manu felelei mama, ua ia osi ai le taulaga faafetai i le Atua, ona o lona alofa ua mafai ai ona faasaoina mai ai o ia ma lona aiga mai le lolo

Ioe tamaiti, o le faatuatua ma le usita’i o Noa i le Atua, ua mafai ai ona faasaoina mai ai o ia ma lona aiga. E taua lou usita’i ma faalogo i ou matua, aemaise tagata matutua. Aemaise ai lava lou toaga e te alu i le lotu, aoga Aso Sa, autalavou ma le aoga a le faifeau, e manuia ai lou olaga.

GALUEGA FAATINO:

Valivaliga Ata: Ia fai ni kopi o le ata ua saunia e tufa i le vasega e galulue ai.

PESE: O ai na fau o le vaa

A’OA’OGA:

1. Ia faatuatua ma talitonu i le Atua e manuia ai
2. Ia ola usita’i ma faalogo i matua

TATALO:

Viiā pea oe Tamā i lou alofa mo i matou. Ua faaiuina ma le manuia le matou aoga. A’oa’o mai pea lau afio i au Afioa Paia,

ina ia o matou iloa atili lou fetalai mai mo i matou. Suafa oe Iesu.. Amene

ASO SA:

20 AOKUSO 2017

**MATAUPU:
MA'I FULA**

UA FAAMALOLO E IESU LE

SINI:

Ia a'oa'o le vasega ia malamalama, na faamalolo e Iesu le ma'i fula i le Aso Sapati.

TUSI FAITAU:

Luka 14: 1 – 6 (mo le Faiaoga)

Luka 14: 4 (mo le Vasega)

“ Ua latou faalologo lava. Ona tago atu lea o ia ia te ia, ua faamalolo ia te ia, ma tuu atu e alu”

FESOASOANI MO FAIAOGA:

Ua oo i le Aso Sapati poo le Aso Sa, ona alu lea o Iesu i le fale o le tasi Faresaio, o loo tumutumu ai le toatele o tagata. Peitai, o loo i ai se tagata o loo maua i le ma'i fula. Ona fai atu lea o Iesu i le au a'oa'o tulafono ma le au Faresaio, “Pe sa ea ona faamalolo i ma'i i le sapati?” Ae o tagata na i ai, ua latou lamalama ia Iesu, pe faamalolo e Iesu le tagata ma'i fula i le sapati. Ua faasolo le vaai a Iesu i tagata na i ai, ona ia tago atu lea o ia i le tagata ma'i fula, ua faamalolo ia te ia, ona malolo ai lea. Ona toe fai atu lea o Iesu i le au a'oa'o tulafono ma le au Faresaio, “O ai so outou ua iai se asini po o se povi ua paū i le

lua, e le sisi a'e loa i luga i le aso sapatii?" Peita,i ua leai ma se isi e tali atu ia Iesu.

Ioe, o le alofa o Iesu, ua ia le taofia ai lava le faamaloloina o le tagata mai fula, ae faatino lana galuega alofa, ua mafai ai ona faaola le tagata o loo fia maua se fesoasoani.

GALUEGA FAATINO:

Valivaliga Ata: Fai ni kopi o le ata ua saunia e tufa i le vasega e galulue ai.

PESE: (fati le pese: Bind us together, Lord bind us together)

O Iesu le foma'i mo tagata uma
Pipili, tauaso, ma ma'i fula
E le faapito lona alofa
Mo oe ma a'u le tagata ia ola
E silisili ese lava ia
E mamalu ma ofoofogia
E silisili ese lava ia
E mamalu ma ofoofogia

A'OA'OGA:

1. E le faapito le alofa o Iesu
2. Ua faamalolo e Iesu le tagata ma'i fula

TATALO:

A'oa'o mai pea i matou Iesu e, ina ia tumau i matou i le ola talitonu ma faatuatua pea ia te oe. Amene

ASO SA:

27 AOKUSO 2017

**MATAUPU:
FOA'I**

O LE TAMAITIITI LOTO

SINI:

Ia a'oa'o le vasega ia
malamalama, o le foa'i a le
tamaitiiti, na maona ai le motu o
tagata.

TUSI FAITAU:

Ioane 6: 1 – 14 (mo le Faiaoga)
Ioane 6: 9 (mo le Vasega)

*“ O lo o iinei le tama o iate ia
areto karite e lima, ma nai i'a iti e
lua lau”*

FESOASOANI MO FAIAOGA:

Ua maliu atu Iesu i le isi itu o le vai o Kalilaia, o le vai lea o Tiperia. Ua mulimuli atu i ai le motu o tagata aua ua latou ofo ma talitonu i vavega ma faamalologa a Iesu na malolo ai tagata mama'i. Ona fai atu lea o Iesu ia Filipo, “O i fea tatou te faatauina mai ai ni areto, ina ia aai ai i latou nei?” O lona uiga tamaiti, o loo fesili tofotofo Iesu pe tumau lona faatuatua, ae o loo iloa lelei e Iesu le mea e tatau ona fai. Ae tali mai Filipo ia Iesu. “E le lava areto, pe a faatauina i tenari e lua selau, ina ia tofu i latou ma sina mea itiiti.”

Ona fai mai ai lea o le isi so'o o Iesuo Aneterea, o le uso o Simona Peteru, “O loo iinei le tama o ia te ia areto karite e lima ma nai i'a iti e lua lau, ae aumā ea ia mea ia i latou e toatele?” Ona fai atu lea o Iesu i ona so'o, ia latou fai atu i tagata e taoto i le manaia o le mutia. Ona tago lea o Iesu i areto ua ia

faafetai atu i le Atua, ona tufatufa atu lea i le motu o tagata. UaIa faapena foi ona fai i tama'i i'a e lua, ma tufatufa atu i tagata e aai ai. Fai mai ua maona tagata, ona o ifo ai lea o le ausooma latou faapotopoto meaaai na totoe, ua tutumu ai ato e sefulu ma le lua. Ona iloa ai lea e tagata na i ai, le vavega ua faia e Iesu i areto e lima ma nai i'a lau e lua. Ona latou fai mai lea, "E moni, o lea lava perofeta lenei, o lē maliu mai i le lalolagi"

GALUEGA FAATINO:

Valivaliga Ata: Fai ni kopi o le ata ua saunia e tufa i le vasega e galulue ai.

PESE: Oh Lord, I am hungry and I want to be fed

A'OA'OGA:

1. Ia loto foa'i ma alofa i soo se tagata
2. E ofoofogia vavega na faia e Iesu

Saunia e lau Susuga se tatalo e faaiu ai le mataupu

MANATU TAIALA O SETEMA: E TAUA TAGATA UMA

Ia faailoa pea i le fanau le taua o tagata uma i le silafaga paia a le Atua. Poo le a le vaivai ma le faatauvaavaa o le tagata, ae mafai lava ona fa'aaogaina e le Atua i soo se galuega ua tofia i ai.

ASO SA:

3 SETEMA 2017
(Aso Sa o le Tala Lelei)

MATAUPU:
MEFIPOSETA
SINI:

UA ALOFA TAVITA IA

Ia a'oa'o le vasega ia malamalama, ua alofa Tavita i le atalii o Ionatana lana uo mamae.

TUSI FAITAU:
Faiaoga)

2 Samuelu 9: 1 – 13 (mo le

2 Samuelu 9: 7 (mo le

Vasega)

“Ona fai ane lea o Tavita ia te ia. Aua le fefe, aua ou te agalelei lava i a te oe, ona o Ionatana lou tamā; ou te toe tuu atu lava ia te oe le fanua uma o Saulo lou tamā”

FESOASOANI MO FAIAOGA:

O Tavita, o lona tamā o Iese. Ua avea o ia ma tupu o Isaraelu. Ua aami e Tavita Sipa le auauna a Paulo ma fesili i ai, “E i ai ea se isi o le aiga o Saulo o i ai ina ia ou alofa i ai ona o Ionatana?” Ia iloa e outou tamaiti, o Ionatana o le uo mamae a Tavita. Ae tali atu Sipa ia Tavita le tupu, “Ua toe lava o si atalii o Ionatana e pipili, o Mefiposeta lona igoa. Ona fai atu lea o Tavita ia Sipa, “Ia aami vave o ia ma aumai iinei i lo’u fale.”

Ua aami Mefiposeta, o loo i le fale o le aiga o Makiro le atalii o Amuelu i Lotapara, ma ua taunuu ane i le fale o Tavita. Ona ia faapa’ūfaō ai lea ma ifo. Ona fai atu lea o Tavita ia Mefiposeta, “Aua e te fefe, aua ou te agalelei lava iā te oe, ona o Ionatana

lou tamā; ou te toe tuu atu lava iā te oe le fanua uma o Saulo lou tamā; ao oe, ta te aai faatasi ma a’u i la’u laoi e le aunoa.” Ona ifo lea o Mefiposeta ma fai atu ia Tavita, “O ai ea a’u lau auauna, ina ua e silasila i le ulī mate, e pei o a’u nei?” Ona fai atu lea o Tavita ia Sipa, “O mea uma sa ia Saulo, ia toe avane uma i le atalii o lou alii. Ia outou faamamā i lona fanua ma tapena ni meaai mo ia i aso uma. O Mefiposeta foi, ma te aai faatasi ma ia e le aunoa e pei o so’u atalii moni.”

Ioe tamaiti! E ese le lelei o Tavita a ea? O lona alofa faamaoni ia Mefiposeta ona o Ionatana lana uo mamae. O le alofa o Tavita e lei faapito nao ia ma lona aiga, ae ua ia alofa i le tagata ese la te le aiga. Atonu o le isi lea mea ua valaauina ai e le Atua e fai ma tupu, ona o ia o se tagata alofa i soo se tasi o loo fia maua se fesoasoani. Ia ‘aua ne’i e alofa nao oe lava, ae ia e alofa atu i soo se isi, ona faamanuia mai ai lea o le Atua.

GALUEGA FAATINO:

Valivaliga Ata: Fai ni kopi o le ata ua saunia ma tufa i le vasega e galulue ai.

PESE: (fati i le pese: Suauu lau lamepa ia mu pea)

Le feiloaiga a Tavita ma le pipili
Tavita ua faapea atu i le atalii
Aua e te fefe ou te alofa i a te oe
E tuuina atu oloa a lou tamā i a te oe

Pese faafetai. Pese faafetai
Pese faafetai i le alofa o le matai
Pese faafetai, Pese faafetai
Pese faafetai i le alofa o le matai

A’OA’OGA:

1. E faamaoni le alofa o Tavita ia Mefiposeta.
2. Aua ne’i faapito lou alofa.

TATALO:

Le Atua e, ia e faailoa pea i ai matou le taua o le alofa atu i soo se tasi, o le viiga sili lea mo lau Afio... Amene

ASO SA:

10 SETEMA 2017

MATAUPU: AGASALA

UA AAI IESU MA TAGATA

SINI:

Ia a’oa’o le vasega ia malamalama, e le’i faapito le alofa o Iesu i tagata amiotonu, ae ua ia alofa foi i tagata agasala..

TUSI FAITAU:

Mataio 9: 10 – 13 (mo le Faiaoga)
Mataio 9: 13 (mo le Vasega)

“Auā ou te le’i sau e valaau i e amiotonu, a’o e ua agasala”

FESOASOANI MO FAIAOGA:

Ua aai faatasi Iesu ma tagata ao lafoga e toatele, ma e ua agasala, faatasi ma le au so’o o Iesu. Ua iloa e le au faresaio, ona o latou fai atu lea i le au so’o o Iesu, “Aisea ua aai faatasi ai Iesu ma tagata ao lafoga ma tagata agasala?” Ua iloa e Iesu le lē fiafia o le au faresaio, ona ia fai atu lea, “E lē aoga le foma’i i e malolo, na o e mama’i. Ina o ia, inā a’oa’o po o le a le uiga o lea upu. Ou te loto i le alofa, ae le o le taulaga; auā ou te lei sau e valaau i e ua amiotonu, ao e ua agasala.”

Tamaiti, o le alofa o Iesu e le faapito nao se tagata e toatasi. E tutusa uma tagata ia Iesu. Po o le malosi, maua i ma'i o le tino, poto pe vaivai i le aoga, faalogogata ma lē usitai, e alofa lava Iesu iā te oe.

GALUEGA FAATINO:

Valivaliga Ata: Fai ni kopi o le ata ua saunia e tufa i le vasega e galulue ai.

PESE: E alofa Iesu iā te oe

A'OA'OGA:

1. E tutusa tagata uma i le alofa o Iesu
2. Aua le tusitusi lima ma vaai maualalo

Saunia e lau Susuga se tatalo e faaii ai le mataupu

ASO SA: 17 SETEMA 2017

MATAUPU: UA FA'AAOGAINA E LE
ATUA LEPELA

SINI: Ia a'oa'o le vasega. ia malamalama, o lepela na mafai ai ona maua meaai mo le nuu o Samaria

TUSI FAITAU: 2 Tupu 7: 3 – 15 (mo le Faiaoga)
2 Tupu 7: 9 (mo le Vasega)

*“Ona latou fetautalatala’i ai lea,
E le tatau le mea o tatou o faia
nei, o le aso manuia lenei aso.”*

FESOASOANI MO FAIAOGA:

O le tatou tala i lenei taeao e faatatau i le nuu o Samaria. Sa i ai le oge i le nuu o Samaria. Sa i ai ni lepela e toafa sa i ai i lea nuu. Ua latou talatalanoa i le leaga e oo iai latou, pe a nonofo ai pea i Samaria. Ona o latou o lea i le togalauapi a Suria. Peitai, e oo atu lepela i le toagalauapi a Suria, ua leai ma nisi o le au tau a Suria, ua sosola ese i latou i le fia feola. Ua nao solofanua ma asini o noatia ai, ma fale ie o loo i ai. Ua fiafia lepela ona ua latou ulu atu i le fale ie muamua, o loo tele ai meaai ma vai inu. Ua latou aai fiafia ma feinu, ma ave ario ma auro sa i ai i le togalauapi. Ona latou talatalanoa lea ma faapea ane, inā tatou o ia e ta’u atu i le tupu. Ona o latou o ai lea.

Ua iloa e le tupu le tala ua ta’u atu e lepela, ona ia tulai ai lea ma fai atu i ana auauna. “Sei o’u fa’aali atu iā te outou le mea ua faia e Suria iā te i tatou. Ua iloa e Suria ua tatou matelaina, o le mea lea ua latou o ai i tua o le toagalauapi e lalafi ai i le vao.” Ona o ai lea o auauna a le tupu o Samaria e asi le toagalauapi a Suria, pe sa’o le tala ua avatu e lepela. Ua toe foi mai auauna a le tupu ma ta’u mai le tala. Peitai, e oo atu le nuu o Samaria, ua latou vete i le toagalauapi na aai ma feinu fiafia ai.

Ioe tamaiti, o le o ese mai o lepela mai i Samaria, o se mea lelei ua latou faia mo le nuu o Samaria. Ua mafai ona tele meaai ua maua e Samaria ma ua ola fiafia ai.

“ Na o atu ‘au a Suria, na latou au mai foi mai le nuu o Isaraelu le tasi teine itiiti o le taua, ua fai ma auauna a le avā a Naamanu ”

FESOASOANI MO FAIAOGA:

O Naamanu, o ia o le taitai au a le autau a Suria. O se tagata e toa ma malosi. E maua o ia i le ma’i lepela. Ona aumai lea e le au tau a Suria le tasi teineitiiti o le taua mai i Isaraelu, ua fai ma auauna a le avā a Naamanu. Ua iloa e le teineitiiti o loo maua Naamanu i le ma’i lepela, ona ia fai atu lea i le avā a Naamanu, “O lo o i ai le Perofeta i Isaraelu, atonu e maua ai se fesoasoani mo le ma’i o Naamanu.”

Ua faalogo i ai le tupu o Suria i le tala a le teineitiiti, ona ia ave lea o le tusi i le tupu o Isaraelu, ina ia faatea le ma’i lepela o Naamanu. Ua alu le malaga a Naamanu ma tuuina atu le tusi i le tupu o Isaraelu, ona ita ai lea o le tupu o Isaraelu ma saei ona ofu. Ona fai atu lea o Elisaia le tagata o le Atua, “Se a ea le mea ua e saei ai ou ofu? Ina sau lava ia iā te a’u. Ona iloa lea e Naamanu o loo i ai le tagata o le Atua i Isaraelu. Ua ta’u atu e Elisaia i lana auauna, ia alu e faailoa atu ia Naamanu, e alu e taele faafitu i le vai i Ioritana, ona faate’aese ai lea o le ma’i lepela mai lona tino.

Ua faailoa atu ia Naamanu le mea e fai. Peitai, ua ita Naamanu ma faapea ane, e tatau ona sau i fafo Elisaia ma valaau i le suafa o le Alii lona Atua, ma talo lona lima, ona faate’aese ai lea o le lepela mai lona tino. Ua le fiafia lava Naamanu ma toe foi atu i Suria, ae peitai, ua o ane nisi o ana auauna ma tauanau o ia, ia usita’i i le faatonuga a Elisaia, i le mea e tatau ona fai, atonu e mamā ai lona ma’i lepela. Ona alu ifo lea o Naamanu, ua fufui

faafitu lona tino i le vai i Ioritana, ona faate'aeseina ai lea o le ma'i lepela mai i lona tino.

GALUEGA FAATINO:

Valivaliga Ata: Fai ni kopi o le ata ua saunia e tufa i le vasega e galulue ai.

PESE: Nothing is impossible/E leai se mea e le mafai

A'OA'OGA:

1. E avea i tatou le fanau ma ave feau a le Atua.
2. O auuuna a le Atua e ala mai ai faamalologa.

Saunia e lau Susuga se tatalo e faaiu ai le mataupu

MANATU TAIALA O OKETOPA: IA FAAMAONI I LE ATUA

Ia a'oa'o pea le fanau i le taua o le ola talitonu, faatuatua ma faamaoni i le Atua, e ala i tiute ma tofi ua valaauina ai e le Atua.

ASO SA: 1 OKETOPA 2017

TUSI FAITAU: Kenese 1: 27 – 29

FESOASOANI MO FAIAOGA:

Ua saunia tauloto, pese ma le tala e fesoasoani i lau susuga mo le tapenaga o le Lotu Tamaiti.

Tauloto:

“Ona faia lea e le Atua o le tagata i lona faatusa, o le faatusa o le Atua na ia faia ai o ia, na faia e ia o i laua o le tane ma le fafine.”

“Ua faamanuia foi e le Atua iate i laua, ma ua fetalai atu le Atua iate i laua, Ia fanafanau ia, ma ia uluola, ma ia tumu ai le lalolagi, ia faatoilalo i ai, ma ia pule i i’a o le sami, ma manu felelei, atoa ma mea ola uma e fetolofi i le eleele.”

“Ua fetalai atu foi le Atua, Faauta, ua ou foai atu ia te oulua o laau afu uma e tutupu ma o latou fua o i le fogaeleele uma lava, atoa ma laau uma ua i ai le fua o le laau e tupu ma ona fatu, e ia te oulua ia e fai ma mea e ‘ai.’”

PESE: GOD MADE ME

God made me
God made you
God made us to be like him
With bright eyes, sweet smile
Feeling happily
God made us to be like him

O leAtua na faia a’u
O le Atua na faia oe
Na faia i tatou ia pei o Ia
O ou mata, lauata
O lagona fiafia
Na faia i tatou ia pei o Ia.

TALA I NISI O MEA NA TUTUPU I LE GALUEGA TALAI A IESU

O le tala i nisi o mea na tutupu i le galuega a Iesu.

Faamatala 1: I le tasi aso, ao taoto Iesu i le fale e taumafa, na omai ai ia te ia o tagata ao lafoga ma e agasala, ua taoto e aai faatasi ma Iesu ma ona so'o.

Faamatala 2: O le masani faa-Iutaia, e le tatau ona aai faatasi se a'oa'o po o se tagata maualuga ma e matitiva ma e agasala. Ua iloa atu e le au faresaio, ona latou fai atu ai lea i so'o o Iesu.

Faresaio 1: Vaai atu ia outou i tagata ao lafoga ma tagata agasala la e, La ua aai faatasi mai ma Iesu....

Faresaio 2: Sa'o lelei oe, oka se le fefefe ma le aai faatasi ma Iesu.

Au so'o 1: Talofa! E i ai se mea ou te fesoasoani atu ai iate outou?

Faresaio 3: Se a le mea ua aai faatasi ai la outou a'oa'o ma e ao lafoga ma agasala.

Au so'o 2: E a e i ai se leaga?

Faresaio 4: Ioe! Aua tou te fia popoto. O le tonu, e sili pe a tatou o e ta'u i toaiina o le nuu.

Faamatala 3: Ua lagona atu e Iesu, ona fetalai atu ai lea o Ia ia te i latou.

Iesu: E le aoga le fomai i e mama'i, ina o ia, ina a'oa'o po o le a le uiga lea upu, OU TE LOTO I LE ALOFA AE LE O LE TAULAGA, aua oute le'i sau e valaau i e amiotonu, a o e ua agasala.

Faresaio 1,2,3,4 (Tutu ma faasaga ia Iesu ma luelue i ai o latou ulu. A o fai le a'oa'oga ona savavali lea i tua o Iesu ma lana vaega faatasi ma le au faresaio)

A'oa'oga : Matua e, o le uiga lea o le Tala Lelei ia Iesu, ia ta'u atu i tagata uma, na te le faailogaina se tagata. E lē tusitusi lima i se ua leaga, i se ua agasala, ma'i pe mativa, ae taua ia Iesu le fesoasoani i ai ma faailoa i ai le alofa silisili ese o le Atua. Na te lavea'i ma faaola tagata uma, aemaise e agasala ina ia salamo ma toe foi atu i le Atua ma le faamaoni.

ASO SA: 22 OKETOPA 2017

MATAUPU: O TAVITA LE LEOLEO MAMOE

SINI: Ia a’oa’o le vasega ia malamalama, o Tavita le leoleo mamoe, na tofia e fai ma tupu o Isaraelu

TUSI FAITAU: 1 Samuelu 16: 1 – 13 (mo le Faiaoga)
1 Samuelu 16: 11 (mo le Vasega)

“ Ona fai atu lea o Samuelu ia Iese. Ua atoa mai ea taulelea? Ua fai mai o ia, Ua toe lava o le uii, faauta foi, o loo leoleo o ia i mamoe. Ona fai mai atu lea o Samuelu ia Iese. Ia aami atu i a te ia , aua tatou te lē vagavagai le laoi seia sau o ia iinei “

FESOASOANI MO FAIAOGA:

Ua fetalai atu le Atua ia Samuelu, “Ia e alu ma ave lau fagu suauu. Ou te auina atu oe ia Iese le Peteleema, auā ua ou iloa i ona atalii, le tasi ou te faia ma tupu.” Ua fai atu Samuelu i le Alii, “E faafefea ona ou alu e faataunuu le faatonuga ua e manao mai ai? A faalogo i ai Saulo, ona ia fasioti lea iā te a’u.” Ua toe fetalai atu le Alii ia Samuelu, “Ia e alu ma ave se tama’i povi e osi ai le taulaga, ma ia fai atu ia Iese ma ona atalii, ia potopoto ane uma e fai le taulaga, ona ou faasino atu lea o lē o le a faauuina.” Ona usitai lea o Samuelu, ua alu i Peteleema. Peitai, ua fefefe toelaiina o le nuu o Peteleema ma fai atu ia Samuelu, “E te maliu mai ea ma le filemu?” A uaa tali atu Samuelu, “Ua ou sau ma le filemu e fai ai taulaga i le Alii, inā faapaia outou iā te outou, ma o mai iā te au e fai le taulaga.”

Ua faapaia e Samuelu Iese ma ona atalii,ma ua latou osi faatasi le taulaga. Na muamua lava vaai Samuelu iā Eliapo le isi atalii o Iese, ona fai mai lea o Samuelu, “E moni lava o loo i luma o le Alii le a faauuina e ia.”A ua fetalai mai le Atua ia Samuelu, “Aua e te vaai i lona tino, poo le maualuga o lona tino, auā ua ou tetee iā te ia, auā e le vaai tagata i le tino, ae vaai le Alii i le loto.” Ua alu ane Apinatapa i luma o Samuelu, ae lei filifilia o ia. Ua alu ane Sama, aw lei filifilia foi o ia. Ua fai atu Iese i ona atalii e toafitu, ia latou omai i luma o Samuelu. Ua omai i latou, peitai, ua lē filifilia foi i latou. Ona fai atu lea o Samuelu ia Iese, “Ua atoa mai ea taulelea?” Ua tali atu o ia, “Ua toe lava o le uii, o loo leoleo o ia i mamoe.” Ona fai atu lea o Samuelu ia Iese, “Ia alu se feau faavave i le tama ma aumai iinei. E le mafai ona tatou nonofo i lalo seia sau o ia iinei.”

Ua sau le tama, ua igoa o ia ia Tavita. O se tama e aulelei ma enaena mumu lona lauulu. Ua fetalai mai le Alii ia Samuelu,“Tulai ia, ina faau’u iā te ia, auā o ia lava lena.”Ona tago lea o Samuelu i le fagu suauu, ua faauu ia Tavita ai i luma o ona uso, ona osofia ai lea o ia e le Agaga o le Alii. Ua uma le galuega a Samuelu ona alu ai lea o ia i Rama.

Ioe tamaiti, e ese le manaia o le tulaga ua oo i ai Tavita a ea? O lana galuega, o le leoleo mamoe, ae ua faaeaina o ia e le Atua e fai ma tupu, ona o lona faamaoni ma le loto maualalo.

GALUEGA FAATINO:

Valivaliga Ata: Fai ni kopi o le ata ua saunia ma tufa i le vasega e galulue ai.

PESE: *(fati pese: Farao tuu maia lou nuu sei o matou o)*

Samuelu tulai ma ave le suauu
Ou te tofia le atalii e faauu
Samuelu faasolo le vaai
Toafitu atalii na i ai
Tavita ua filifilia e le matai
E manuia, e manuia
E manuia mea uma lava x2
E manuia mea uma lava
Pe a galue ma le faatauvaa
E pei o Tavita a'o i ai I lana galuega.

A'OA'OGA:

1. Ia galue ma le faamaoni i tofiga ua aumai e le Atua
2. Aua le vaai i le tino ae vaai i le loto

TATALO:

Le Atua lo matou Tamā, ia e fesoasoani mai ia i matou ina iamatou maua pea le loto maualalo. Amene

ASO SA: **29 OKETOPA 2017**

MATAUPU: **O KONELIO LE TAGATA O**
NUU ESE

SINI: Ia a'oa'o le vasega ia malamalama, o Konelio le tagata o nuu ese, e talitonu ma mata'u i le Atua

TUSI FAITAU: Galuega 10: 1 – 8 (mo le Faiaoga)
Galuega 10: 2 (mo le Vasega)

“ O le tagata amio Atua, ma le mata’u i le Atua, atoa ma lona aiga uma, o lē avatu mea alofa e tele i le nuu, ma ua tatalo i le Atua e le aunoa “

FESOASOANI MO FAIAOGA:

Sa i ai i Kaisareia le tasi tagata e igoa ia Konelio, o le taitai o le toaselau i le au a Italia. O ia o se tagata o nuu ese. E ui o se tagata ese, ae o loo faamatalaina o se tagata e mata’u i le Atua. E foa’i ana taulaga ma tausisi i amio faa-kerisiano. E fiafia e tatalo i le Atua. I le tasi aso poo i le itula e tolu i le afiafi, ae ulufale atu le agelu a le Atua ma faapea atu, “Konelio e, ua o a’e au tatalo ma au mea alofa o fai ma faamanatuga i luma o le Atua. Ia e auina atu ni tagata i Iopa e aami ia Peteru, o loo nonofo ia ma le tasi Simona, o le fai pa’u o manu, e latalata i le sami lona fale. O ia na te ta’u atu ia te oe mea e tusa ona e faia. Ona usitai lea o Konelio ma faataunuu le feau a le Atua .

Tamaiti, na faateia Peteru ina ua ia maua le tala ia Konelio, ma ia iloa ai, e le faailoga tagata le Atua, auā o lea ua ia talia le tagata o nuu ese.

GALUEGA FAATINO:

Valivaliga Ata: Fai ni kopi o le ata ua saunia ma tufa i le vasega e galulue ai.

PESE: Love is something that you give it away

A’OA’OGA:

1. E le faailoga tagata le Atua
2. Ia fiafia e foa’i lau taulaga mo le Atua

TATALO:

A’oa’o mai pea lau Afio iai matou ina ia o matou faia pea mea sili mo lau Afio. Amene.

**MANATU TAIALA O NOVEMA: TUU I LE ATUA
O TATOU MANA’O**

Ioe, o le faatinoga lea o lo tatou faatuatua i lo tatou Atua, ave uma iai o tatou manao, ona tatou manuia ai lea.

ASO SA: 5 NOVEMA 2017

MATAUPU: UA TALILE ATUA IA ESEKIA

SINI: Ia a’oa’o le vasega ia malamalama, na tali le Atua i le tatalo a Esekia.

TUSI FAITAU: 2 Tupu 20:1 – 6 (mo le Faiaoga)
2 Tupu 20:5 (mo le Vasega)

“ua ou faalogo i lau tatalo, ua ou iloa ou loimata, faauta foi oute faamalolo ia te oe,”

FESOASOANI MO FAIAOGA

Tamaiti, o le tala lenei i le ma’i o Esekia le Tupu. Ua tigaina ua lata ona oti. Ona auina mai lea e le Atua o lana perofeta o Isaia, e alu ma fai atu ia Esekia, ua fetalai mai le Alii, e saunisana mavaega i lona aiga, aua o le a e maliu o ia, ma e le toe soifua lava. Ona faanoanoa ai lea o Esekia, ua faasaga foi ona fofoga i le pa o lona fale. Ua tatalo ma aioi atu i le Alii, ia manatu mai i lona savali i ona luma ma le faamaoni o lona loto. O lo o ia faia foi mea uma na finagalo i ai.

Ua silasila mai le Alii i le tagi lotulotu a Esekia le taitai o lona nuu. Ua faafofoga le Alii i lana tatalo, ua iloa foi ona loimata. “Ona fetalai mai lea o le Alii, oute faamalolo faaopoopo ni tausaga o lona ola e sefulu ma le lima.” Ona malolo ai lea o Esekia aua ua talia e le Atua lona manao.

UIGA O UPU MA FUAITAU:

- | | |
|------------------------------|------------------------------------|
| i) mavaega:
a alu ese atu | Faamavae o le a oti, faamavae o le |
| ii) perofeta: | Auauna a le Atua. |
| iii) aioi: | Tauanau, poo le taumafai. |
| iv) malolo: | malosi |
| v) tagi lotulotu: | matuā tagi leo tele. |

GALUEGA FAATINO:

Valivaliga Ata: Fai ni kopi o ata ua saunia ma tufatufa i le vasega.

FESOASOANI MO FAIAOGA

Ua uma nisi o faamalologa a Iesu, ona maliu ese ai lea o Ia. Ua agai e lata ane i le vai o Kalilaia, ma maliu ae i le mauga. Ona nofo lea o Ia i lalo, a ua le mafai le lolofi mai ia te Ia o le motu o tagata.

Ua aumai ia te Ia o e pipili, o e mumutu, o tausao, ma e gugu, ua latou tuu atu foi i ona vae. Ona valaau lea o Iesu i lona Atua e ala i ana faamalologa. Faauta, ua malolo ai latou. Ua tau fai ofo foi le motu o tagata ma ua faateleina le viiga o le Atua o Isaraelu ona o Iesu.

UIGA O UPU:

- i) faamalologa: fa'aaogaina le Mana o le Atua e fai ma vai fofo i ma'i.
- ii) lolofi: O mai faatasi tagata e toatele
- iii) gugu: lē mafai ona tautala
- iv) pipili: lē mafai ona savali
- v) mumutu: lē mafai ona savali / vae mutu, lima mutu.

GALUEGA FAATINO:

Valivaliga Ata: Fai ni kopi o le ata ua saunia ma tufa i le vasega e galulue ai.

PESE:

1. O au o le pipili ua sau
Ma le loto ua faanaunau
Lagona lou mafatia
Iesu e, ia e talia
2. O au o le tauaso ua sau

3. O au o le gugu ua sau
4. O le mumutu lea ua sau
O lou loto faatauanau
Ua lagona pea lou mafatia
Iesu e, ia e talia

A’OA’OGA:

1. Alu ia Iesu pe a e ma’i
2. Na o Iesu e tali i ou mafatiaga
3. O Iesu le foma’i sili

(Saunia pea e lau susuga se tatalo e faaiu ai le mataupu.)

ASO SA:

19 NOVEMA 2017

MATAUPU:

O LE TO’OTO’O O ARONA

SINI:

Ia a’oa’o le vasega ia malamalama, i le mafuaaga na folo ai e le to’oto’o o Arona to’oto’o o taulaitu Aikupito.

TUSI FAITAU:

Esoto 7:10 – 12(mo le Faiaoga)
Esoto 7: 12e (mo le Vasega)

“ona liu gata ai lea; a ua folo o latou tootoo e le tootoo oo Arona”

FESOASOANI MO FAIAOGA

Tamaiti, o le tala leni i le vavega na faia e le Atua, e ala i le tootoo o Arona. Ua o atu nei Mose ma Arona ia Farao, e tusa ai ma le poloaiga a le Atua, ina ia ave ese mai lona nuu i Aikupito.

Ua faama'a'aina e le Atua le loto o Farao, lea lava ua saga fitivale ai. Ua oo la la tauiviga i to'oto'o. Aua ua lafo e Arona lona to'oto'o i luma o Farao ma ana auauna, ona liu gata ai lea o le to'oto'o.

Ona valaau ai lea o Farao i taulaitu, ua lafo foi o latou to'oto'o, ua liu gata foi. Ona folo ai lea e le to'oto'o o Arona o latou to'oto'o na liu gata. O le faatusa o le mana Silisili Ese o le Atua, e liu suavai ai mea uma ma e le faatusaina i se isi malosi.

UIGA O UPU MA FUAITAU:

- | | |
|-------------------|----------------------------|
| 1. taulaitu: | tagata faitogafiti pepelo. |
| 2. faama'a'aina: | fia toa, fia malosi |
| 3. Mose ma Arona: | auauna a le Atua |
| 4. Farao: | tupu o Aikupito |
| 5. tauiviga: | finauga |

GALUEGA FAATINO:

Valivaliga Ata: Fai ni kopi o le ata ua saunia e tufa i le vasega e galulue ai.

PESE: (fati: Tavita o le toa)

Farao le tupu saua
Ua faalumaina
Ina ua folo ana gata
E le to'oto'o o Arona
Ua faama'a'aina
O ia e le Atua
Aua ua le faalogo
Ia Mose ma Arona

A’OAOGA:

1. Usita’i ma faalogo i le Atua
2. Aua e te faatautee i le Atua
3. Aua le finau i le Atua

(Saunia pea e lau susuga se tatalo e faaiu ai le mataupu.)

ASO SA:

26 NOVEMA 2017

MATAUPU:

UA TA E MOSE LE PAPA

SINI:

Ia a’oa’o i le vasega ia malamalama i le mafuaaga na ta ai e Mose le papa.

TUSI FAITAU:

Esoto 17:1 – 7 (mo le Faiaoga)

Esoto 17: 6c (mo le Vasega)

*“e te taia le papa ona puna mai ai
lea o le vai, e feinu ai le nuu”*

FESOASOANI MO FAIAOGA:

O le savaliga a Isaraelu i le vao. Ua to lauapi foi i Refiti, ae leai se vai e feinu ai le nuu, ona finau lea o le nuu ia Mose mo se vai sei feinu ai. Ua taliatu Mose i le nuu; aisea ea tou te tofotofo ai le Alii? A ua le mafai le finau mai o le nuu ia Mose, ua latou muimui foi ia te ia.

Ua latou fai atu; Se a le mea na ave ae ai i matou nai Aikupito, ia matou oti i lenei vao ma a matou fanau? Ua fia feinu foi a matou manu, ona alaga lea o Mose i le Alii, ua ia faapea atu: Se a ea le mea oute faia i lenei nuu, toe ina o latou fetogi ia te au i maa ona o le fia feinu? Ona fetalai mai lea o le Atua ia Mose; Ia

MANATU TAIALA O TESEMA:

AVE FEAU O LE KERISIMASI

Tamaiti, o tatou o ave feau o le Kerisimasi e ala i lo tatou faia o amio lelei o le usita'i ma faalogo i matua. O le feau lelei lea mo le Kerisimasi.

ASO SA: **03 TESEMA 2017**

MATAUPU: **UA VALAAU LE AGELU IA MARIA**

SINI: Ia a'oa'o le vasega ia malamalama i le mafuaaga na valaau ai le agelu ia Maria.

TUSI FAITAU: Luka 1: 26 – 38 (mo le Faiaoga)
Luka 1: 31 (mo le Vasega)

“Faauta foi, o le a to oe, ma e fanauina se tama tane, e te faaigoa ia te ia o Iesu.”

FESOASOANI MO FAIAOGA:

Na auina e le Atua le agelu o Kaperielu i le aai o Nasareta i Kalilaia, ina ia faailoa atu ia Maria le taupou, o le to o ia, ma fanau mai ai se tama tane.

Ona popole ai lea o ia, ua manatu foi pe se a ea le uiga o lenei alofaaga. A ua fai mai le agelu ia te ia. “Maria e, ‘aua e te fefe, aua ua alofaina oe e le Atua. Faauta o le a to oe, ma e fanau se tama tane, e te faaigoa foi ia te ia o Iesu. E sili o ia, ma e ta’ua

foi o le Alo o le Atua. Esilisili ese, e foa'i foi iate ia le nofoaiga a Tavita lona tamā. E fai o ia ma Tupu i le aiga o Iakopo e faavavau. O lona malo foi e leai sona gataaga.”

Ona fai mai lea o Maria i le agelu, “A faapefea le mea nei, aua ou te le iloa se tane.” A ua tali mai le agelu ia Maria ua faapea mai, “Maria e, e afio ifo le agelu i luga iā te oe. E faamalumalu ifo foi iā te oe le mana silisili ese, ma e ta'ua foi le tama Paia o le a fanau mai, o le Alo o le Atua.” Ua ia faapea atu foi ia Maria, “O lou aiga foi o Elisapeta, ua to foi o ia ina ua loomatua, ma o le tama tane foi lana tama. Ma e leai lava se mea e lē mafaia e le Alii.” Ona tali atu lea o Maria i le agelu, “Faauta, o a'u lava o lau auauna. Ia faia iā te au e tusa o lau fetalaiga.” Ona alu ese ai lea o le agelu ia te ia.

UIGA O UPU:

- | | | | |
|------|-------------|---|---|
| i) | to | - | ua i ai le pepe i le manava o se fafine |
| ii) | faamalumalu | - | luga a'e. |
| iii) | Kaperielu | - | agelu a le Atua. |
| iv) | alofaaga | - | moomooga |
| v) | faufautane | - | sauni o le a fai le toalua |
| vi) | ulufale | - | sau i totonu o le fale |
| vii) | popole vale | - | fefe ma mata'u |

GALUEGA FAATINO:

Faatino le tala e le vasega

PESE: (*fati: alalaga ia*)

Le valoaga fiafia
Na ave ia Maria
Na te fanaua le tama
O le tama o le folafolaga
O ia o le Tupu
E igoa ia Iesu
Pepese ma vivii ia
Ua fanau mai le Mesia

A’OA’OGA:

1. Usita’i ma faalogo i matua, o le feau lena mo le Kerisimasi. Ia alolofa i matua. Alofa i soo se tasi.

TATALO FAAIU:

Saunia e lau susuga se tatalo e faaiu ai le Mataupu.

ASO SA:

10 TESEMA 2017

**MATAUPU:
LEOLEO MAMOE**

UA FA’AALI LE AGELU I

SINI:

Ia a’oa’o le vasega ia malamalama
i le feau na ave atu e le agelu i
leoleo mamoe.

TUSI FAITAU:

Luka 2:8-11 (mo le Faiaoga)
Luka 2:11 (mo le Vasega)

*“aua o le aso nei ua fanau ai i le
aai a Tavita, lo outou Faaola, o le
Alii ia o Keriso. ”*

FESOASOANI MO FAIAOGA

Tamaiti, o le tala, ua o le au leoleo mamoe i le vao, ua momoe ai, ona o le leoleoina o a latou lafu mamoe. Ua oo i le po, ua tete'i lava i le tu mai o le agelu a le Alii. Ua pupula mai foi ia te i latou le pupula o le Alii. Ua matua'i fefefe ai lava i latou. Ua faapupuu solo ua fefefe, ae te'i i le faalogo atu ua fetalai mai le agelu. "Aua toute matatau; auā faauta, ou te aumai ia te outou le Tala Lelei e olioli ai nuu uma." Ua faalologo le au leoleo mamoe ma le popole i lenei feau.

Ona fetalai mai lea o le agelu. "Faauta, 'aua tou te matatau, aua ou te aumai ia te outou le Tala Lelei o le olioli tele e oo mai i nuu uma. O le aso nei, ua fanau ai ia te outou i le aai o Tavita le Faaola, o Ia o Keriso le Alii."

UIGA O UPU:

- | | | | |
|------|-------------|---|------------|
| i) | leoleoina | - | vaavaai |
| ii) | faapupuu | - | maalilili. |
| iii) | olioli | - | fiafia. |
| iv) | tala fiafia | - | Tala Lelei |

GALUEGA FAATINO:

Valivaliga ata: Fai ni kopi o le ata ua saunia e tufa i le vasega e galulue ai.

PESE: *(fati: lou moega i le papa)*

Leoleo mamoe i le vao
Leoleo ai ma malolo
Ae faailoa mai loa e le fetu
Ua fanau mai Iesu

A’OA’OGA:

1. Na fa’aali le agelu i leoleo mamoe i le vao.
2. ‘Aua e te faatuai, ae tula’i loa ma talia le valaau ua fanau mai le Mesia.

TATALO FAAIU:

Saunia e lau susuga se tatalo e faaiu ai le Mataupu.

ASO SA:

17 TESEMA 2017

**MATAUPU:
MAKOI**

UA AVE MEAALOFA A

SINI:

Ia a’oa’o le vasega ia malamalama,i meaalofa a le au makoi na ave i le pepe o Iesu.

TUSI FAITAU:

Mataio 2:10-11 (mo le Faiaoga)
Mataio 2: 11 (mo le Vasega)

“ona latou avatu ai lea ia te ia o meaalofa , o le auro, ma le pulu lipano, ma le pulu muro ”

FESOASOANI MO FAIAOGA:

O le au makoi, o ni tagata mai Arapi e popoto tele i le tau o fetu. O le mafuaaga foi lea, na iloa ai e Makoi le fetu, fialia loa ma lo tatou talitonuga, o le fetu lava lea o le a taitaiina i latou i le mea o fanau ai Iesu.

Ua pupula tele mai le fetu i luga o le fale o manu. Ua iloa atu foi e Makoi le tamaititi ma Maria lona tinā. Ona latou faapau ai lea i lalo ma ifo atu ia te ia. Ua talai foi a latou meaalofa. O le auro, pulu lipano ma le pulu muro, ma ofo atu mo le pepe fou.

UIGA O UPU MA FUAITAU:

- i) auro - maa taua toe taugata
- ii) pulu muro - o le u’u manogi
- iii) pulu lipano - o le laau manogi lea sa faatau e Iuta mai i isi nuu.
Isaia 5: 6; Ieremia 6: 20. Sa fai ai mea manogi e faamu ai taulaga.
- iv) Arapi - o le malō poo le atunuu
- v) makoi - tagata vaai fetu, tagata popoto
- vi) fale manu - fale e tuu ai manu

GALUEGA FAATINO: SOLO

O le fanau mai o Iesu
Na iloa e Makoi i le fetu
O le fetu lava na taitai
Tulai loa Makoi e le faatali
Na ave foi ni meaalofa
E ofo atu mo le Faaola.

PESE: TOATOLU TUPU

E toatolu tupu na ō
Na latou iloa le fetu
A’e, ifo, ave meaalofa
E lei malolo

A'OA'OGA:

1. Ia tatou nonofo sauniuni aua le afio mai o le pepe fou.
2. O le usitai, o lau meaalofa sili lena i ou matua i le Kerisimasi.

TATALO FAAIU:

Saunia e lau susuga se tatalo e faaiu ai le Mataupu.

MANUIA LE
KERISIMASI